


史部傳記類



至聖先師孔子刊定世家卷二



明兵部職方清吏司主事後學浙慈馮煥謹輯

秦始皇二十七年東巡至魯觀孔子宅召孔子九世孫
鮒爲魯國文通君拜少傅先是孔子將終遺秘書曰
不知何一男子自稱秦始皇我堂踞我牀顛倒我
衣裳行至沙丘而亡後皆如其言

三十四年議燔書陳餘謂孔鮒曰秦將滅先王之籍
而子爲書藉主其危哉子魚曰吾爲無用之學知吾
者惟友秦非吾友吾何危顧有可懼者必或求天下

之書焚之書不出則有禍吾將先藏之以待其求求
至無患矣乃與弟子襄藏書屋壁自隱嵩山無何陳
涉起爲楚王召鮒爲博士遷太傅凡仕六旬言不用
退而老于陳將沒戒其弟子曰魯天下有仁義之國
戰國之世講頌不輟且先君之廟在焉叔孫通處濁
世而清其身學儒術而知權變是今師也宗於有道
必有令圖歸必事焉

職方氏曰漢高太牢一祠尹起莘謂四百年命脉
所基孰知秦始皇初并天下卽召孔鮒爲文通君

復拜少傅豈若漢高遲之十二年卽孔騰奉嗣之
封實啓于孔鮒之文通則孔子沒而知尊孔子者
始皇始之若焚書坑儒暮年李斯輩成之適足殺
身亡國而所坑本方士言神仙扶蘇特借誦法孔
子以感動之且始皇豈不知鮒爲書籍主卒未嘗
窮治而必出之則焚經而經固存也善乎太史公
之推尊之也曰天下君王至于賢人衆矣當時則
榮沒則已焉孔子布衣傳十餘世學者宗之自天
子王侯中國言六藝者折中于夫子可謂至聖矣

固不專言漢也諒哉惟祕書所遺類啓後世識緯
術數之疑然予謁孔林見墓南有虛塚云當時預
設以待始皇者也攷之志果有白兔溝云先聖墓
北有虛墓五間皆石爲之秦始皇發塚有白兔出
於中始皇逐之至曲阜八里溝而沒因以名溝而
始皇竟不能顛倒衣裳以去夫詩列秦風書終秦
誓其或繼周百世可知不爾安所稱通明之聖乎
而第不以是名耳且毀宅奏金絲懷璧兆六七荆
棘自除于誅惡面汗自溢于流賊炳炳如丹馬可
誣也第希聖者而必求爲可知則其流必爲京房
爲康節而不可而若以常人窺聖人而謂爲聖人
之所必不爲則未知聖之所以爲聖矣

漢高帝誅項藉舉兵圍魯魯中諸儒尚講習禮樂絃
歌之音不絕

元年正月丙午封孔叅爲蓼侯位次三十叅以執盾
前元年從起碣以左司馬入漢爲將軍三以都尉擊
項藉屬韓信破楚垓下有功卽楚漢春秋及史記所
謂孔將軍居左者也封三十年而薨年五十三謚夷

侯子臧孝文九年嗣侯四十五年歷位九卿遷御史大夫辭乞爲太常武帝元朔元年坐爲太常率冠道橋壞不得度免子琳嗣侯琳生二子黃茂黃坐事失侯宣帝元康四年藜玄孫長安公士宣詔復家哀帝時大司徒光以其祖有功德而邑土廢絕分所食邑三百戶封黃弟茂爲關內侯生子國子國生子卬爲諸生善詩禮子卬生仲驩爲博士弘農守善春秋三傳仲驩生子立善詩書友劉歆嘗以清議論貶丹史教授闕里數百人子立生子元善楊雄以郎校書七年官不益子元生子建不仕莽

職方氏曰此卽孔叢子所云少子之後以軍功封蓼侯者也子順少子樹生熙連叢作彥譜系作聚漢書作藜漢法非軍功不侯列侯賢者得都九列登三事故非列侯不相我朝公侯伯爲世爵而都督五府京營漕運擇賢而任亦此意也時郡縣與封建相錯爲治每下詔必曰郡國守相曰縣道邑侯國故侯有邑號者皆得治其邑下此若關內侯則但守關內食租衣稅而不得出關統蒞矣臧

以橋道壞免太常仍守侯至黃始坐事失侯光分
所食三百戶封茂爲關內侯則侯名存而蓼邑失
矣孔子固曰軍旅之事未之學也而他日曰我戰
則必克固饒爲之特慎言之耳而豈知後裔封侯
之業先自軍功得之乎近得新葺闕里誌列孔藋
賜爵蓼侯于恩官曾不思漢初無恩澤侯又安得
舉邑侯而輕畀之少子後乎使非功而以恩何中
子奉嗣之封尚在十二年之後而少子後更先得
之乎此載筆之所以難而慎毋輕改作可也

十二年十一月行自淮南

討黥布也

還過魯以太牢祠孔

子以顏回配享封孔鮒弟騰爲奉嗣君詔諸侯玉卿
相至郡先廟謁而後從政

職方氏曰漢高因文通君鮒已故卽錄其弟騰爲
奉嗣而更不問世嫡之所在若論世嫡則文通之
子隨字元路者固在也自奉嗣君之玄孫霸爲元
帝師始得以已褒成之封祀孔子于是宗祀之傳
屬中支而不歸之長矣及霸子光因梅福之請申
匡衡之議以隨之玄孫吉爲殷後封紹嘉公于是

長支不後孔而後湯而光復分已食邑以續三支
之世封于是三支子孫無慮不爲君公者矣顧丘
瓊山謂此漢以下祀孔子之始亦新官到任謁廟
之始須知梅福所云仲尼之廟不出闕里此外更
無祀孔子者漢高因過魯故祠宅廟因令從政至
郡者必先廟謁至元成宗大德初勅到任官先詣
宣聖廟殿謁方許詣以次神廟著爲令而到任謁
廟始通之天下然其意則始乎是矣

呂后元年二月初置孝弟力田科二千石各舉一人
職方氏曰漢之人才出於吏蕭曹開基邁跡刀筆
惡嗜文墨議論哉至呂后置孝弟力田科猶有惇
本務實之意焉卽二千石各舉一人亦不能出吏
上也觀文翁治蜀招下縣子弟以爲學官子弟除
更繇高者以補郡縣吏次爲孝弟力田可想見矣
時惟京師有學官亦止隸太常而他郡國蔑有故
以修起學官獨歸文翁云

漢景帝前三年徙淮陽王餘爲魯王程姬長子是爲共王
好治宮室壞孔子舊宅以廣其宮於壁中得先世子

襄所藏古文虞夏商書及傳論語孝經皆科斗文字
王又升孔子堂聞金石絲竹之音乃不壞宅悉以書
還孔氏科斗書廢已久時人無能知者先是秦燔書
禁學濟南伏勝壁藏之漢定求其書亡十篇獨得二
十九篇卽以教齊魯間漢文帝求能尚書者聞勝故
爲秦博士治之欲召見年九十餘老不能行詔太常
掌故晁錯往受之勝語訥錯不能辨勝受少女少女
授錯訖孝宣世有歐陽大小夏侯氏立于學官爲今
文書而孔子十一世孫曰安國者以所聞伏生之書
考論文義定其可知者爲隸古定更以竹簡寫之增
多伏生二十五篇伏生又以舜典合于堯典益稷合
于臯陶謨盤庚三篇合爲一康王之誥合于顧命復
出此篇并序凡五十九篇爲四十六卷其餘錯亂磨
滅弗可復知悉上送官藏之書府以待能者承武帝
詔爲五十九篇作傳遭巫蠱事未列于學官

漢景帝末廬江舒人文翁爲蜀郡守脩起學官於成
都市中招下縣子弟以爲學官子弟爲除更繇高者
以補郡縣吏次爲孝弟力田常選學官僮子使在便

坐受事每出行縣益從學官諸生明經飭行者與俱使傳教令出入閨閣縣邑吏民見而榮之數年爭欲爲學官弟子富人至出錢以求之繇是大化蜀地學於京師者比齊魯焉至武帝時乃令天下郡國皆立學校官自文翁爲之始云蜀有文翁石室設孔子坐像其坐歛蹠向後屈膝當前上古以來君臣及七十二弟子繪事兩旁晉王右軍嘗簡蜀守寫倣之有宋嘉祐中王公素摹爲禮殿圖此像之最古者然皆漢衣冠也

文翁名堂

漢武帝建元元年冬十月詔舉賢良方正直言極諫之士廣川董仲舒對以諸不在六藝之科孔子之術者皆絕其道勿使並進邪僻之說滅息然後統紀可一而法度可明天子善其對丞相衛綰奏所舉賢良或治申商韓非蘇秦張儀之言亂國政請皆罷奏可五年春置五經博士

元光元年冬十一月初令郡國舉孝廉各一人○五月詔賢良曰朕聞昔在唐虞畫象而民不犯日月所燭莫不率俾周之成康刑錯不用德及鳥獸教通四

海海外肅脊北發渠搜氏羗徠服星辰不字日月不
蝕山陵不崩川谷不塞麟鳳在郊藪河洛出圖書鳴
呼何施而臻此與今朕獲奉宗廟夙興以求夜寤以
思若涉淵水未知所濟猗與偉與何行而可以章先
帝之洪業休德上參堯舜下配三王朕之不敏不能
遠德此子大夫之所睹聞也賢良明於古今王事之
體受策察問咸以書對著之于篇朕親覽焉於是董
仲舒公孫弘等出焉

四年八月徵吏民有明當世之務習先聖之術者縣
次續食令與計偕

職方氏曰此後世以經術時務試士之始蓋前此
孝廉孝舉未仕廉察見任大都與孝弟力田賢良
方正直言極諫諸科均以行舉而此則以言揚耳
然有虞敷納以言成周三物論藝則從古先資之
矣

元朔元年冬十一月詔曰公卿大夫所使總方畧一
統類廣教化美風俗也夫本仁祖義褒德祿賢勸善
刑暴五帝三王所繇昌也朕夙興夜寐嘉與宇內之

士臻於斯路故旅耆老復孝敬選豪俊講文學稽參
政事祈進民心深詔執事興廉舉孝庶幾成風紹休
聖緒夫十室之邑必有忠信三人並行厥有我師今
或至闔郡而不薦一人是化不下究而積行之君子
壅於上聞也二千石官長紀綱人倫將何以佐朕燭
幽隱勸元元勵蒸庶崇鄉黨之訓哉且進賢受上賞
蔽賢蒙顯戮古之道也其與中二千石禮官博士議
不舉者罪有司奏議曰古者諸侯貢士一適謂之好
德再適謂之賢賢三適謂之有功迺加九錫不貢士
一則黜爵再則黜地三則黜爵地畢矣夫附下周上
者死附上罔下者刑與聞國政而無益于民者斥在
上位而不能進賢者退此所以勸善出惡也今詔書
昭先帝聖緒令二千石舉孝廉所以化元元移風易
俗也不舉孝不奉詔當以不敬論不察廉不勝任也
當免奏可

五年夏六月詔曰蓋聞導民以禮風之以樂今禮壞
樂崩朕甚憫焉故詳延天下方聞之士咸薦諸朝其
令禮官勸學講議洽聞舉遺興禮以爲天下先太常

其議予博士弟子崇鄉黨之化以勵賢材焉丞相弘請爲博士置弟子員學者益廣漢興言易自淄川田生何言書自濟南伏生勝言詩於魯則申培公於齊則轅固生燕則韓太傅嬰言禮則魯高堂生言春秋於齊則胡毋生於趙則董仲舒而公孫弘以治春秋爲丞相封侯天下學士靡然鄉風矣弘爲學官悼道之鬱滯請因舊官而興焉爲博士官置弟子五十人復其身肄習于太常傳授以博士爲師太常擇民年十八以上儀狀端正者補博士弟子郡國縣官有好文學敬長上肅政教順鄉里出入不悖所聞令相長丞上屬所二千石二千石謹察可者常與計偕詣太常得受業如弟子一歲皆輒課能通一藝以上補文學掌故缺其高第可以爲郎中太常藉奏卽有秀才異等輒以名聞其不事學若下材及不能通一藝輒罷之而請諸能稱者臣謹案詔書律令下者明天人分際通古今之誼文章爾雅訓辭深厚恩施甚美小吏淺聞弗能究宣亡以明布諭下以治禮掌故以文學禮義爲官遷留滯請選擇其秩比二百石以上及

車百石通一藝以上補左右內史大行卒史比百石
以下補郡太守卒史皆各二人邊郡一人先用誦多
者不足擇掌故以補中二千石屬文學掌故補郡屬
備員請著功令他如律令制曰可自此以來公卿大
夫士吏彬彬多文學之士矣昭帝時舉賢良文學增
博士弟子員滿百人宣帝末增倍之元帝好儒能通
一經者皆復數年以用度不足更爲設員千人郡國
置五經百石卒史成帝末或言孔子布衣養徒三千
人今天子太學弟子少於是增弟子員三千人歲餘

復如故平帝時王莽秉政增元士之子得受業如弟
子勿以爲員歲課甲科四十人爲郎中乙科二十人
爲太子舍人丙科四十人補文學掌故云自商瞿受
易孔子授橋庇庇授馯臂臂授周醜醜授孫虞虞授
田何及秦禁學易爲卜筮書獨不禁故傳受者不絕
也而田何之易授丁寬寬授田王孫王孫授施讐孟
喜梁丘賀繇是易有施孟梁丘之學而施家有張禹
彭宣之學喜授白光瞿牧繇是有瞿孟白之學梁丘
有士孫張鄧彭衡成之學而焦延壽嘗從孟喜問易

京房受易延壽會喜死房以爲延壽易卽孟氏學瞿
白不肯皆曰非也而房以明災異得幸授殷嘉姚平
乘弘皆爲郎博士繇是易有京氏之學而費直治易
長於卦筮亡章句高相專說陰陽災異繇是易有高
氏學高費皆未嘗立於學官歐陽生事伏生授倪寬
寬授歐陽生子世世相傳至曾孫高高孫地餘地餘
少子政爲王莽講學大夫由是尚書世有歐陽氏學
而歐陽大小夏侯氏學皆出於寬高授林尊尊授平
當陳翁生由是歐陽有平當陳翁生之學而夏侯都

尉從濟南張生傳族子始昌始昌傳勝勝又事簡卿爲

倪寬門人勝傳從兄子建建又事歐陽高由是尚書

有大小夏侯之學而勝傳周堪孔霸由是大夏侯有

孔許之學建授張山拊山拊授李尋鄭寬中張無故秦

恭假倉由是小夏侯有鄭張秦假李氏之學而孔氏

有古文尚書孔安國以今文字讀之因以起家申公

以詩春秋授瑕丘江公及許生徐公而韋賢治詩事

大江公及許生又治禮至丞相傳子玄成亦至丞相

及兄子賞至大司馬由是魯詩有韋氏學王式事徐

公許生而張長安唐長賓褚少孫亦來事式由是魯詩有張唐褚氏之學諸齊以詩顯貴皆固之弟子也昌邑太傅夏侯始昌最明而后蒼事始昌始昌通五經昌亦通詩禮授翼奉蕭望之匡衡授師丹伏理滿昌由是齊詩有翼衡師伏之學而昌授張邴皮容皆至大官徒衆尤盛韓嬰推詩人意作內外傳頗與齊魯殊然歸一也淮南貢生受之韓生亦以易授人推易意爲傳燕趙間好詩故其易惟韓氏自傳之孫商爲博士孝宣時韓生其後也以易徵待詔曰所授易卽先太傅所傳也嘗受韓詩不如韓易深故專傳之而趙子事韓生授蔡誼誼授食子公五甘食生授栗豐吉授長孫順由是韓詩有王食長孫之學而毛公趙人也治詩授貫長卿長卿授解延年延年授徐敖教授陳俠爲王莽講學大夫由是言毛詩者本之徐敖魯高堂生傳士禮十七篇而魯徐生善爲頌爲禮官大夫孫子至孫延襄及弟子公戶滿意桓生單次皆爲禮官大夫而蕭奮以禮至淮陽太守孟卿事奮以授后蒼問丘卿蒼說禮數萬言號曰曲臺記授

聞人通漢戴聖慶普由是禮有大戴德小戴聖慶氏
之學而大戴有徐氏良小戴有橋仁楊榮氏之學胡
毋生治公羊弟子羸公授孟卿眭孟而嚴彭祖與顏
安樂俱事眭孟由是公羊春秋有嚴顏之學安樂授
冷豐任公由是顏家有冷任之學疏廣事孟卿授寬
路貢爲事羸公成于眭孟授堂溪惠惠授真都都與
路又事安樂故顏氏復有寬真之學穀梁子本魯學
公羊氏廼齊學也江公受穀梁春秋及詩于申公傳
子至孫爲博士榮廣皓星公二人受焉詔太子受公
羊而太子復私問穀梁而善之宣帝聞衛太子好穀
梁遂興穀梁蔡千秋周慶丁姓皆從廣受千秋又事
皓星公尹更始本事千秋又受左氏傳傳子咸及翟
方進房鳳始江博士授胡常常授蕭秉王莽時爲講
學大夫而姓授申章爲博士徒衆大盛由是穀梁春
秋有尹胡申章房氏之學哀帝時王龔與房鳳劉歆
共校書三人皆侍中歆白左氏春秋可立哀帝納之
以問諸儒皆不對歆數見丞相孔光以求助光卒不
肯惟鳳龔許歆遂共移書責讓太常博士而漢興張

蒼賈誼張敞劉公子皆脩左氏傳誼爲傳訓故授賈
公子長卿授張禹非成帝師禹授尹更始更始傳子咸及
翟方進胡常常授賈護授陳欽欽授左氏授王莽至
將軍而劉歆從尹咸及翟方進受由是言左氏者本
之賈護劉歆

職方氏曰按晉灼曰西京無太學公孫弘請因舊
官而興爲其肄業之地則太常也傳授之師則五
經博士也然三輔黃圖漢太學在長安西北七里
關中記在安門東杜門西何武歌太學下王咸舉
幡太學下則有太學矣或曰晉灼以漢初言黃圖
記武帝時事未知孰是

漢昭帝始元五年六月詔曰朕以眇身獲保宗廟戰
戰慄慄夙興夜寐脩古帝王之事通保傳傳孝經論
語尚書未云有明其令三輔太常舉賢良各二人郡
國文學高第各一人

漢宣帝本始元年夏四月庚午地震詔曰郡國舉文
學高第各一人

四年四月地震北海瑯琊壞祖宗廟令三輔太常內

郡國舉賢良方正各一人

地節三年十一月詔曰朕旣不逮導民不明反側晨興念慮萬方不忘元元惟恐羞先帝聖德故並舉賢良方正以親萬姓歷載臻茲然而俗化闕焉傳曰孝弟也者其爲仁之本與其令郡國舉孝弟有行義聞於鄉里者各一人

元康元年秋八月詔曰朕不明六藝鬱于大道是以陰陽風雨未時其博舉吏民殫身脩正通文學明于先王之術宣究其意者各二人

神爵四年以鳳凰甘露降集京師令內郡國舉賢良可親民者各一人

甘露三年詔諸儒講五經同異于石渠閣閣在未央宮殿北蕭何造礎石爲渠于下以導水藏入關所得秘書圖籍

元帝初元元年詔褒成君孔霸以所食邑八百戶祀孔子奉嗣君騰字子襄長九尺六寸又爲惠帝博士遷長沙太傅年五十七騰生忠字子貞該習有高志爲博士年五十七忠生武及安國武字子威爲武帝

博士臨淮太守早卒武生延年治尚書博覽武帝時
爲博士轉太傅遷大將軍年七十一延年生霸字次
孺亦治尚書幼有奇才昭帝末爲博士宣帝時爲大
中大夫選授皇太子經遷詹事高密相元帝卽位徵
霸以師賜爵關內侯食邑八百戶號褒成君給事中
加賜黃金二百斤第一區徙名數籍戶于長安霸上書
求奉孔子祭祀帝下詔曰其令師褒成君關內侯霸
以所食邑八百戶祀孔子焉故霸還長安子福名數
于魯奉孔子祀上欲相霸自陳至三諒其至誠弗用
益敬之薨年七十二素服臨弔者再賜東園秘器錢
帛以列侯禮謚曰烈君子福嗣年六十二薨子房嗣
房薨子莽嗣俱關內侯奉孔子祀孔叢子祈云中子
之後奉夫子祀爲褒成侯者是也而霸少子光字子
夏充明經學歷輔成哀平三世再爲御史大夫丞相
一爲大司徒太傅太師居公輔者十七年王莽盛憂
懼辭位年七十謚簡烈侯

職方氏曰秦楚漢帝皆錄聖人之世然尚未世封
以祀而史記竟次世家以偶有土抑何卓識深信

乃爾及遷歿而元成間裔孫孔霸爲天子師傳始
得以褒成君之封移祀孔子嗣是若宗聖奉聖崇
聖恭聖褒聖衍聖鄒國文宣之襲封非公侯則大
夫公之隆者以國而侯之殺者以亭萬世之士與
天地並蓋天子不世宇諸侯不世國大夫不世采
而孔子獨能世家一時獨創義例果成終古不刊
彛典卓哉而王文公之論則曰仲尼之才帝王可
也何特公侯哉仲尼之道世天下可也何特世其
家哉處之世家仲尼之道不從而大置之列傳仲

尼之道不從而小而遷也自亂其例愚謂遷之世
家孔子謂之創例則可政不必以亂例苛求之由
今觀之卽欲不以孔子爲世家不可得也然賢子
孫與有力焉自孔霸開中子奉聖之端而長子後
復得奉湯祀則成帝時霸子光已貴顯當世故因
梅福請而遂申匡衡議耳又且分已食邑以續少
子蓼侯封而三支帶礪奕世森映則霸光父子功
居多而光之用心更勤矣昌黎云莫爲之後雖盛
勿傳孔子雖聖非得霸光父子惡能本支百世浸

昌弋獨惜乎光之能述事而不善繼志也夫霸若欲相元帝相之久矣惟自陳望三諒其至誠故不爲耳柰何望塵拜弄臣安漢推巨君即所艷稱登崇躋膺祇來後人彈射之資霸且不願以爲子而况至聖乎一節既隳他美莫贖尚慎旃哉

永光二年三月壬戌朔日食詔下內郡國舉茂材異等賢良直言之士各一人

元帝時求商後先是武帝元鼎四年十一月行幸滎陽還至洛陽丁卯詔曰觀于周道邈而無祀詢問耆老得孳子嘉其封嘉爲周子南君地三十里故帝欲求湯後以存二王而商後分散爲十餘姓郡國往往得其大家推求子孫絕不能紀匡衡議曰王者存二後所以尊先王通三統也其罪絕者更封他親以承其始今宋已失統宜立殷後非當繼宋宜以孔子世爲湯後上以其語不經遂寢

成帝建始元年冬十二月戊申朔日食夜地震未央宮殿中詔丞相御史與將軍列侯中二千石及內郡國舉賢良方正能直言極諫之士詣公車

成帝河平三年秋八月光祿大夫劉尚校中秘書謁
者陳農使使求遺書於天下

四年三月舉惇厚有行能直言之士

陽朔二年九月詔曰古之立太學將以傳先王之業
流化於天下也儒林之官四海淵源宜皆明于古今
溫故知新通達國體故謂之博士否則學者無述焉
爲下所輕非所以尊道也工欲善其事必先利其器
丞相御史其與中二千石二千石雜舉可充博士位
者使卓然可觀

鴻嘉二年三月博士行飲酒禮有雉蜚集于庭歷階
升堂而雊後集諸府又集承明殿詔舉敦厚有行義
能直言者

三年夏四月赦天下令吏民得買爵賈級千錢

一職方氏曰此後世鬻爵賣官之始昔鬲錯嘗請輸
粟塞上俟塞下足支十年然後行之內郡意在實
邊亦風重農蓋饒有力者慮欲贖罪邀榮于法不
得徑用錮勢必就農易粟又不得辭挽運費是故
入粟邊六百石爵上造四千石爲五大夫萬二千

石爲大庶長則粟有所渫而農不病故民益勸農而力本今直計錢買級則市井商販朝離塵肆暮紆朱紫無論戾孝弟力田之科制而重本抑末之初意亦蕩然盡矣夫千錢直十金耳秦爵自造士以至大庶長凡十八級漢因之至武帝武功爵則造士至軍衛凡十一級有若薄遊惡少一旦捐百八十金而卽都一品其于名器謂何抑亦若我朝遙授七品散官者亦至七品止耳然亦非所以示衆庶也雖然猶可言也錢可以買爵而不可以買士則士貴也世變江河潰不可遏至于納粟納馬者皆得以俊秀稱而廁名國學抑三代之隆所稱凡民俊秀者果若輩乎今亦更不責其輸粟而直令其納鏹減價以招之卽百金得折五兩而高官以酬之至提舉運副五品大夫古刑所不上者一朝畀于禮所不下之庶人而不少靳柰何萬乘之君而猶患貧而更不思銖兩之濫入曾無當于泥沙之濫出則經國主計者不可不惕然思反其轍矣

成帝永始三年春正月己卯晦日食詔部刺史舉惇
樸遜讓有行義者各一人

元延元年秋七月有星孛于東井詔公卿大夫博士
議郎與內郡國舉方正能直言極諫者各一人北邊
二十二郡舉勇猛知兵法者各一人

職方氏曰此卽本兵分腹裏邊方之始

成帝

年捷爲郡於水濱得古磬十六枚議者

以爲善祥劉向因是說上宜興辟雍設庠序陳禮樂
隆雅頌之聲盛揖遜之容以風化天下成帝以向言

下公卿議會向病卒丞相大司空奏請立辟雍案行

長安城南營表未作遭帝崩群臣引以爲謚

成帝時梅福上書曰今仲尼之廟不出闕里孔氏子

孫不免編戶以聖人而歆匹夫之祀非皇天之意也

今陛下誠能據仲尼之素功以封其子孫則國家必

獲其福又陛下之名與天亡極

闕里孔子舊里言除
此之外更無祭祀孔

者何者以聖人素功封其子孫未有法也後世必以

爲則不滅之名可不勉哉復言宜封孔子後以奉湯

祀綏和元年推迹古文以左氏穀梁世本禮記相明

遂定孔子爲殷後。○二月癸丑詔曰蓋聞王者必存
二王之後所以通三統也昔成湯受命列爲三代而
祭祀廢絕考求其後莫正孔吉其封孔吉爲殷紹侯
在沛郡 ○三月進爵爲公及周承休侯皆爲公地各
百里

職方氏曰按子順長子鮒生隨字元路隨之玄孫
曰吉于鮒爲五代孫于孔子爲十四代孫吉之子
何齊襲封平帝元始四年改殷紹嘉公孔何齊爲
宋公孔叢子所云長子之後承殷統爲孔公者是
也

綏和二年四月丙午哀帝卽位六月除任子令漢儀
注吏二千石以上視事滿三年得任同產孔子一人
爲郎不以德選故除

職方氏曰此後世任子之始夫任子之恩莫濫于
宋故范文正公當國加意釐汰夷考宋時每歲郊
祀七品滿任皆得推恩子弟之外遍及甥舅濫殊
甚矣汰之宜也若漢制二千石滿三年得任同產
孔子一人爲郎則非尊官滿任不得任其親子可

以弗除也而除之則哀帝之過也第爲郎則太遽
盡亦使之就太學乎三代之隆及其十有五年則
自天子之元子衆子以至公卿大夫元士之適子
與凡民之俊秀皆入大學則學校之設原爲世胄
故太子入學名爲齒胄而第使凡民之俊秀者亦
得與焉蓋公卿大夫元士之適子異日皆有承祧
襲爵之寄非預以學校養之不可而四民各守世
業野處不曠故士之子恒爲士農之子恒爲農卽
四民之能爲士者亦惟農有之而工商不得與焉
漢初舉孝弟力田猶重本業卽

國初商賈之家不許穿紬絹猶可想見抑末之意而
今則已蕩然矣是在司世教者挽之

哀帝建平元年二月詔大司馬列侯將軍中二千石
州牧守相舉孝弟惇厚能直言通政事延于側隨可
親民者各一人

元壽元年春正月辛丑朔日食詔公卿大夫與將軍
列侯中二千石舉賢良方正能直言者各一人

漢平帝元始元年夏五月丁巳朔日食大赦天下詔

公卿將軍中二千石舉敦厚能直言者各一人。六月丙午封周公後公孫相如爲褒魯侯孔子後孔均爲褒成侯。在瑕各二千戶奉其祀。追謚孔子曰褒成宣尼公，均卽孔莽也。避王莽諱，改曰均字長平好學。有大才，莽篡位拜太尉，辭疾還鄉，年八十一。及王莽敗失國。

職方氏曰：按褒成君本元帝所以號孔霸者，而關內侯食邑八百戶，則元帝所以移祀孔子者也。蓋歷元成哀以至平而後謚孔子，以褒成宣尼公封孔子後爲褒成侯云。哀公謚尼父，而進謚曰宣尼。公元帝侯關內而進侯曰褒成，則自平帝始也。元始二年秋，舉勇武有節明兵法郡一人詣公車。職方氏曰：此後世武舉之始。蓋前此元延詔書但行邊郡，而今則不分內郡邊郡矣。

三年春正月，立官稷及學官。郡國曰學，縣道邑侯國曰校，校學置經師一人，鄉曰庠，聚曰序，序置孝經師一人。

職方氏曰：此後世郡縣儒學社學之始。按二典有

教無學念始終典于學惟教學半自商書始見而
惟皇上帝降衷于下民若有恒性克綏厥猷惟后
詰語寔天命謂性率性謂道修道謂教宗諦故學
術淵源肇自堯舜之精一執中而微言與義層見
叠出則歸于賢聖之君六七作三代風俗莫徽于
商抑知其自學術中來而孔子殷人也則傳恭遠
矣若學校之設則自五帝成均始豈庖犧一畫便
開言語文字戶牖而因性牖民卽標枝野鹿之世
所不能廢乎成均之遺禮爲法者國之子弟公卿
大夫之子弟當學者謂之國子易氏釋之曰成其
行之虧均其習之偏也旨哉其義不亦深乎而未
聞有小學舜曰虞庠亦名米廩皇而祭深衣而養
老以燕禮養國老于上庠養庶老于下庠則虞以
上下分大小矣故曰庠者養也明堂位曰庠者詳
也致禮詳事也三禮義宗曰庠養也養子弟使成
雋德也義固兼之而以視米廩則養老爲近耳夏
后氏曰序收而祭燕衣而養老以饗禮養國老于
東序養庶老于西序則夏以東西分大小也殷曰

學皞而祭縞衣而養老以食禮養國老于右學養庶老于左學則殷以右左分大小也殷尚質取物成故貴右而賤左文王因之小學在國中左也大學在郊右也則以服事殷之實政也而孟子謂夏曰校殷曰庠周曰序繁稱多辭奚適而可及周公制禮兼立四學養國老于東膠養庶老于虞庠教世子及群后之子與鄉中俊選所升之士而成王尊魯亦立四代學故明堂位文王世子註謂魯有米廩東序瞽宗頽宮獨頽宮半僻異于王制僻廡耳餘諸侯則但立當代時王學有大小學之殊而已矣是故周室大學辟廡居中惟天子養老及出師受成獻俘大射則就焉東爲夏序亦稱東膠膠者糾也糾錄學士使成德也序者豫也謝者射也春夏學干戈秋冬學羽籥皆于東序小樂正學干大胥贊之籥師學戈籥師丞贊之胥鼓南春誦夏弦大師詔之則文武中也西爲瞽宗秋學禮執禮者詔之則功成治定與己同也北爲虞庠冬讀書

典書者詔之則典謨之教所由興也而又建虞庠于國四郊爲鄉學又以虞庠爲六鄉學而比閭族黨州鄉同之夏序爲六遂學而鄰里鄴鄙縣遂同之仕焉而已者七十致仕退老歸里大夫爲父師士爲少師春將出民平旦里胥坐門右塾爲里右師鄰長登左塾爲左師餘子在序室畢出然後皆歸夕亦如之新穀已入十月事訖餘子皆入學父老教于校室距冬至四十五日始出學秀異者移鄉學于庠序庠序之異者移國學于少學諸侯歲貢少學之異者學于大學命曰造士升之司徒曰選士命鄉簡不率教者以告耆老皆朝于庠元日習射上功習鄉上齒不變命國之右鄉移之左左鄉移之右如初禮不變移之郊移之遂如初禮乃禮象曰辟廡居中南爲成均北爲上庠東爲東序西爲瞽宗文王世子曰於成均以及取爵于上尊是也則周豈直立四代之學更兼五帝之制矣故易傳曰天子旦入東學晝入南學夕入西學暮入北學在中央曰大學而大戴保傳曰帝入東學上

親貴仁則親賤有序恩相及矣帝入南學上齒貴
信則長幼有差民不誣矣帝入西學上賢貴德則
聖智在位功不遺矣帝入北學上貴尊爵則貴賤
有差下不踰矣帝入太學承師問道退習而考于
太傳太傳罰其不則達其不及則德智長而治道
得矣此五學者既成于上而百姓黎民化輯于下
矣學成治就此殷周之所以長有道也然則帝學
有五自殷已然不始周乎而周人五學之外更有
門闈之學師氏教國子以三德三行居虎門左保
氏教以六藝六儀守王闈蓋以東南稱門西北稱
闈別陰陽矣而世子亦齒焉以學君臣父子長幼
之道故曰行一物而三善皆得者世子入虎闈而
齒胄也是故太子八歲入小學十五入太學公卿
之太子大夫元士適子十三入小學二十入太學
而入君之子十歲出就外傳則就虎門之左師氏
之旁而築宮焉即謂異宮也故入則有保出則有
師燕居出入教喻德成由來漸矣不爲執經授業
設也若大傳小傳則所從受小學業者也至于崇

四術立四教則大樂正之爲也大抵自周以上學
惟以二或尚東尚西或在國在郊爰暨周室學蓋
有六師氏居內大學在國四小在郊國子則舍于
王宮教于師氏時會于大司樂以習誦弦學樂舞
萬民則居于比閭教于塾師時屬于州序以受教
法正齒位皆非常廩之士也自漢景帝時文翁爲
蜀郡守立學官置左右生而郡國始養士武帝立
博士弟子員而大學始養士晉元康始令有國子
學別于太學而北魏四門學後周露門學虎門館

皆依倣虞周而爲之唐則三品以上子弟孫入國
子學五品以上入太學七品以上庶人俊異入四
門學而復有律書算學待八品以下及庶人通其
學者則規制更備品級更詳而宋徽宗崇寧中建
辟雍外學于王國之南亦皆周室虞庠意也然成
周之末處士橫議正學榛蕪重以秦坑漢吏學校
之廢已數百年漢武興學猶肆太常而郡國之學
縣道邑侯國之校校之經師鄉聚之孝經師不意
自王莽輔平帝時復見五帝三王盛事夫以六藝

文奸言以王田掩篡位其所以學所以教者吾不得而知也若其所爲學所爲教者吾不得而訾也由是有郡文學州博士之官至宋慶曆有教授之設而我

朝因而不廢群公侯伯之胄文官三品以上恩廕子弟郡縣計偕下第者與恩歲貢者皆入國子監而郡縣學生曰廩膳猶上溯虞庠東魯米廩之遺意說者謂虞帝尚孝學專養老而魯因以藏染盛之委嗚呼飯香黍而不知粒食之源惡乎可哉

四年改殷紹嘉公爲宋公食邑一千七百六十戶周承休公爲鄭公○二月安漢公奏立明堂辟雍五年春正月禘祭明堂諸侯王二十八人列侯百二十人宗室子九百餘人徵助祭禮畢皆益戶賜爵及金帛增秩補吏各有差詔曰蓋聞帝王以德撫民其次親親以相及也昔堯睦九族舜惇敘之朕以皇帝幼年且統國政惟宗室子皆太祖高皇帝子孫及兄弟吳頃楚元之後漢元至今十有餘萬人雖有王侯之屬莫能相糾或陷入刑罪教訓不至之外也傳不

云乎君子篤於親則民興於仁其爲宗室自太上皇
以來族親各以世氏郡國置宗師以糾之致教訓焉
二千石選有德義者以爲宗師考察不從教令有寃
失職者宗師得因郵亭書言宗伯請以聞常以歲正
月賜宗師帛各十匹

職方氏曰此後世親藩立宗學之始

徵天下通知逸經古記天文歷算鐘律小學史篇方
術本草及以五經論語孝經爾雅教授者在所爲駕
一封軺傳遣詣京師至者數千人

漢光武帝建武五年二月壬申封殷後孔安爲殷紹
嘉公十月幸魯使大司空以太牢祠孔子初起太學
車駕還宮幸太學賜博士弟子各有差

十三年二月庚午以殷紹嘉公爲宋公周承休公爲
衛公位三公上以爲漢賓

十四年四月辛巳封孔子十七代孫志爲褒成侯食
邑二千戶志均之子也時爲密令祭遵建爲孔子立
後奏置五經大夫

職方氏曰按王莽亂漢國統中絕而孔安得以宋

公奉殷孔志得以褒成侯奉孔子則自光武始而
導之者祭征虜也志卒謚元成子一損嗣志之代
有潛者爲後漢太子少傅避地會稽家焉至二十
七代有道隆者位至侍中

十九年又幸太學

二十七年造太學

中元元年起辟雍鍾離意爲魯相出私錢付戶曹孔
訢脩孔子車身入廟拭几席劔履男子張伯除堂下
草得璧七枚懷其一以六枚白意孔子教授堂下牀
頭懸一甕召訢問訢曰夫子甕也背有丹書意發視
之中有素書曰後世脩吾書董仲舒護吾車拭吾履
發吾筭鐘離意璧有七張伯懷其一

漢明帝永平二年三月上臨辟雍初行大射禮○冬
十月壬子幸辟雍初行養老禮詔曰光武皇帝建三
朝之禮而未及臨饗眇眇小子屬當聖業間暮春吉
辰初行大射今月元日復踐辟雍尊事三老兄事五
更安車輶輪供綏執授侯王設醬公卿饌珍腍親袒
割執爵而醕祝哽在前祝噎在後升歌鹿鳴下管新

宮八佾具脩萬舞於庭朕薄德何以克當易陳負乘
詩刺彼已永念慚疚無忘厥心三老李躬年耆學明
五更桓榮授朕尚書詩曰無德不報無言不酌其賜
榮爵關內侯食邑五千戶三老五更皆以二千石祿
養終厥身其賜天下三老酒人一石肉四十斤有司
其存者耆恤幼孤惠鰥寡稱朕意焉養老之儀先吉
日司徒上太傅若講師故三公人名用其德行年耆
高者一人爲老次一人爲更也皆服都紵大袍單衣
皂緣領袖中衣冠進賢扶王杖五更亦如之不杖皆
齋于太學講堂其日乘輿先到辟雍禮殿御坐東廂
遣使者安車迎三老五更天子迎于門屏交禮道自
阼階三老升自賓階至階天子揖如禮三老升東面
三公設几九卿正履天子親袒割牲執醬而饋執爵
而醕祝哽在前祝饁在後五更南向公進供禮亦如
之明日皆詣闕謝恩以見禮遇大尊顯故也郡國縣
道行鄉飲酒于學校皆祀先聖先師周公孔子牲以
犬孟冬亦如之

職方氏曰按梅福云今仲尼之廟不出闕里故永

平二年制郡縣學校得行鄉飲祀周公孔子猶未
立廟也梁武天監四年初立孔子廟唐武德二年
始詔國子學並立周孔廟正觀四年詔州縣皆作
孔子廟而天下之學始皆有廟以祀孔子矣

東平王蒼傳云魯國孔氏尚有仲尼車輿冠履盛德
光靈之遠也

四年帝臨辟廱

八年冬十月丙子帝臨辟廱養三老五更

九年爲樊鄆陰馬四姓小侯開立學校置五經師

十五年三月東巡狩還幸孔子宅祠仲尼及七十二

弟子親御講堂顏指子路室謂左右曰此太僕之室

太僕吾之禦侮也命皇太子諸王說經封十八代孫

孔穎爲褒成侯

注孔子宅在今兗州曲阜縣故魯城中歸德門內闕里之中背洙面泗矍

相圃之東北也漢春秋曰帝時升廟立群臣中庭北

而再拜帝進爵而後坐
漢章帝建初四年十一月壬戌詔曰蓋三代導人教

學爲本漢承暴秦褒顯儒術建立五經爲置博士其

後學者精進雖曰承師亦別名家孝宣皇帝以爲去

聖久遠學不厭博故遂立大小夏侯尚書後又立京

氏易至建武中復置顏氏嚴氏春秋大小戴禮博士
此皆所以扶進微學尊廣道藝也中元元年詔書五
經章句煩多議欲減省至永平元年長水校尉儵奏
言先帝大業當以時施行欲使諸儒共正經義頗令
學者得以自助孔子曰學之不講是吾憂也又曰博
學而篤志切問而近思仁在其中矣於戲其勉之哉
於是下太常將大夫博士議郎郎官及諸生諸儒會
觀講議五經同異使五官中郎將魏應承制問侍中
淳于恭奏帝親稱制臨決如孝宣甘露石渠故事作
白虎議奏

漢章帝元和二年三月車駕東巡過魯庚寅幸闕里
以太牢祠孔子及七十二弟子作六代之學天子升
廟西面群臣在庭北面皆再拜天子進爵而後坐乃
召諸孔丈夫年二十以上者孔損等六十二人臨賜
酒飯時孔僖以蘭臺令史從行自陳謝帝曰今日之
會寧于卿宗有光榮乎僖對曰臣聞明王聖主莫不
尊師而貴道今陛下貴臣祖之道親屈萬乘辱臨敝
里此乃所以崇聖也顧其遺嗣得與群臣同受釐福

愛屋及烏此乃所以崇德也臣宗弗與於光榮非所
敢承帝歎曰非聖者子孫惡有斯言遂拜僖郎中詔
隨車駕賜孔氏男女錢帛僖從還京師遂校書東觀
僖子順三子樹之後也樹生藜十傳而至子建不仕
莽光武中興先是闕里無故荆棘叢生一旦自闕廣
千數百步從舊講堂坦然至里門時董憲彭豐等部
衆鄒魯間郡守上黨鮑彥驚謂子建曰豈卿先君欲
太守行饗禮助誅惡耶子建然之遂定計行饗禮內
爲禽備外示簡易遂擒憲等子建生仁以文學爲議

郎博士南海太守生子豐以學行聞三府交辟委質
司空高第御史建元初大旱䟽時政上納其言三日
卽雨轉黃門侍郎典東觀事生子和卽僖後出爲臨
晉令卒于官留空馬二子長彥季彥遂家臨晉永初
二年季彥如京師省宗人仲淵是年夏河南四縣雨
雹如斗殺物求直言仲淵之客長孫子逸聞季彥言
而善之言于帝召見于德陽殿左右不善其言遂歸
後子逸相魯舉季彥孝廉不就年四十九孔叢子所
云三子之後以軍功封侯者之裔所可知者也

職方氏曰甚哉世儒之好于持論也動譏史遷踈畧輕信是非謬聖及自結撰弊更甚之班范無論矣卽如近世盱江鄧元錫氏函史肩羅古今目無遷固乃不列孔子世家而以年表居之至門人諸將相列傳皆得大書成章而夫子行事反列旁行夫世家如孔氏有幾而元錫尚靳耶獨不思史記年表月表之人物行事未嘗不仍載于世家列傳僅僅一聖人而徑削世家僅存年表彼其意豈不謂表年首事竊以春秋自許乎而其如抵牾更多

卽如家語雖載七十三而譜系明載七十四歲劉恕輩已能言之而今尚仍史記之七十三又安在其必變史記世家爲也不審其年而輕記其事幾何不以甲爲乙以子作丑乎如云戊辰孔子年十九娶宋開官氏朞而生伯魚使十九可信則當爲丁卯使戊辰可據則當爲二十以十九歲娶開官氏至朞而生子鯉則當在二十歲史記伯魚年五十先孔子卒則當是孔子六十九歲事也而函史于壬子六十三歲下書顏回卒孔子明云喪回不

得如鯉之得宜而函史死回于壬子則回當先鯉八年而死矣彼特見史記謂回少孔子三十歲而世稱回三十二而卒故臆書于六十三歲下然亦當在六十二也則孔子十九而娶一年而生鯉鯉五十而卒皆不足憑耶且孔子八世單傳至子順生三子曰鮒騰樹而騰字子襄據孔叢子云長子之後承殷統中子之後奉孔子祀則鮒固未嘗無後而譜系明云鮒生隨字元路五世至孔吉封殷紹嘉公吉子何齊襲封此尤較著者函史何見而

謂鮒無後以弟子騰爲嗣耶騰固鮒弟非鮒弟也且云騰字子襄值秦難藏其家書屋壁中則藏書者鮒也非騰也孔叢子溫公通鑑可攷也彼蓋見史記有鮒爲陳王涉博士死于陳下鮒弟子襄年五十七爲博士遷太守之文而遂以死于陳下爲死陳難以鮒弟之子襄耳然連叢與譜系明言鮒仕陳爲博士遷太傅凡仕六句言不用老于陳將沒戒其弟子歸魯令事叔孫通而惡得以死于陳下遂爲死陳難也陳下非陣下想地名若稷下

類或云死于陳國下也且史記明言鮒弟子襄而
不魯及其名曰騰則子字不係于弟明矣函史知
騰之字子襄乃以騰爲弟子而嗣鮒則旣使鮒有
子而無子又使騰不父其父而父其兄也昔皇甫
規問孔仲淵曰聞孔氏三父後能傳祖業常在叔
祖觀連叢所記信然伯季之後弗克負荷矣仲淵
曰伯之子孫今其可仕季之子孫何所能任且人
之才聖受天有分若如君論則成王伯禽雖致泰
平皆當以不聖蒙罪乎規笑而善之則伯之子孫

至東漢季猶在也緣史遷于鮒以下但錄其位于
朝者故時有揀擇而稱謂句法間亦自不苟函史
本是依樣畫葫蘆只因多插失本色則後世安得
以踈畧輕信罪馬遷而敢爲忠臣哉又孔臧係樹
孫連叢譜系甚明函史顧云比漢世裔孫臧事武
帝爲太常亦係騰下則旣以騰爲鮒後而又以樹
之後後騰抑何謬甚也獨史記謂忠生武武生延
年及安國則安國爲武子而漢書孔光傳及譜系
謂忠生武及安國武生延年則安國爲武弟且漢

書云安國延年皆以治尚書爲武帝博士敘安國于延年上則分明以安國爲武弟而連叢載孔臧與從弟侍中安國書則譜系之以臧與安國同爲十一代兄弟非無稽矣又安國字子國史記謂安國爲今皇帝博士至臨淮太守安國生卬卬生驩則騰之後也而連叢又云關內侯茂生子國子國生子卬子卬生仲驩則又樹之後也而何兩支三代名字皆酷相類也豈非誤于子國之偶同而失之耶然安國之爲子國則與臧同行而爲十一代若茂之子爲子國則正與驩之子名立者同行而爲十四代矣史記之踈畧其在斯乎因并揭之以俟達者有考焉

漢和帝永元四年改封孔損爲褒成侯食邑一千戶追封孔子爲褒尊侯損卒以其子十九代孫曜嗣曜卒以其子二十代孫完嗣俱褒成侯世世相傳至獻帝初完早卒無子國絕母弟讚子羨

十三年春正月丁丑帝幸東觀覽書林閱篇籍博選術藝之士以充其官

十四年三月戊辰帝臨辟雍饗射大赦天下

漢安帝延光三年二月幸太山告岱宗三月戊戌祀孔子及七十二弟子于闕里自魯相令丞尉及孔氏親屬婦女諸生悉會賜褰成侯以下帛有差還幸太學太學在洛陽城開陽門外去宮八里講堂長十丈廣三丈在國子學東二百步辟雍去明堂三百步車駕臨辟雍從北門入○三月九日行太射禮

漢順帝永建六年九月詔脩太學用作工徒十一萬二千人凡造二百四十房七八百五十室陽嘉元年作畢立碑于國子堂左太學石經東南面刻頌

三月庚寅帝臨辟雍饗射大赦天下改元陽嘉七月丙辰以太學新成試明經下第者補弟子增甲乙科員各十人除郡國耆儒九十人補郎舍人冬十一月辛卯初令郡國孝廉限年四十以上諸生通章句文史能牋奏乃得應選其有茂才異行若顏淵子奇不拘年齒閏月丁亥令諸以詔除爲郎年四十以上課試如孝廉科者得參廉選歲舉一人二年六月辛未以太常魯國孔扶爲司空冬十月庚午行禮辟廱奏

應鍾始復黃鐘作樂器隨月律

孝質帝本初元年夏四月庚辰令郡國舉明經年五十以上七十以下詣太學自大將軍至六百石皆遣子受業歲滿課試以高第五人補郎中次五人太子舍人又千石六百石四府掾屬三署郎四姓小侯先能通經者各令隨家法各經家數其高第者上名牒當以次賞進

漢桓帝元嘉二年三月廿七日壬寅司徒吳雄司空趙戒言魯相乙瑛書言孔子經緯天地幽贊神明故特立廟褒成侯四時來祠事已卽去廟有禮器無常人掌領請置百戶卒史一人典主守廟春秋饗禮財出王家錢給大酒直湏報謹問太常祠曹掾馮牟史郭玄辭對故事辟雍禮夫行祀先聖師侍祀者孔子子孫太宰太祝令各一人皆備爵太常丞監祠河南尹給牛羊豕雞各一大司農給米祠臣愚以爲如瑛言孔子大聖則象乾坤爲漢制作先世所尊祠申衆牲長吏備欲加寵子孫敬恭明祀傳于罔極可許臣請魯相爲孔子廟置百戶卒史一人掌領禮器出王

家錢大酒直他如故事制曰可下魯相承書從事下
當用者選其年卅已上經通一藝雜試通利能奉弘
先聖之禮爲宗所歸者如詔書永興元年六月甲辰
朔十八日辛酉魯相平言謹按文書守文學椽魯孔
龢師孔憲戶曹史孔覽等雜試龢脩春秋嚴氏經通
高第事親至孝能奉先聖之禮爲宗所歸除龢補名
狀如牒終漢世爲魯從事者十有一人有後漢鐘太尉書碑刻在
關其讚曰巍巍大聖赫赫彌章相乙瑛字少卿平原
高唐人令鮑疊字文公上黨屯留人政教稽古名重

規矩乙君察舉守宅除吏孔子十九世孫麟廉請置
百戶卒史一人鮑君造作百戶吏舍功垂無窮於是
始

永壽二年青龍在涪灘九月五日魯相韓勅謂顏氏
聖舅家居魯親里開官氏聖妃在安樂里聖族之親
禮所宜異復顏氏開官氏族屬邑中繇發脩飾宅廟
更作二輿朝車威熹制禮樂器鐘磬瑟鼓壘洗觴觚
爵鹿俎豆籩衽禁違有碑其文曰皇賦統華胥承天
畫掛顏育空業孔制元孝俱祖紫宮太乙所授前闔

九頭以升言教後制百王獲麟來吐制不空作承天之語乾元以來三九之載八皇三代至孔乃備聖人不世期五百載三陽吐圖二陰出讖制作之義以俟知奧於穆韓君獨見天意復聖之族遠越紀思脩造禮樂胡輦器用存古舊宇慙慙宅廟朝車威熹出誠造涼不水解工不爭價深除玄汙水通流注禮器升堂天雨降澍百姓訢和舉國家慶神靈佑誠竭敬之報天與厥福永享年壽上極垂祀旁及皇代刊石表銘與乾輝耀長期蕩蕩於盛復授赫赫罔窮聲垂億載

延熹五年四月己巳太學西門無故自壞襄楷以爲太學前疑所居其門自壞文德將喪教化廢弛是後天下遂至喪亂

漢靈帝建寧二年三月七日己酉魯相史晨上言臣蒙厚恩受任符守得在奎婁周孔舊寓以建寧元年到宮行秋饗飲酒畔宮畢復禮孔子宅拜謁神坐仰瞻穰穰俯視几筵靈所憑依肅肅猶存而無公出酒脯之祠臣即自以俸錢脩上案食醞具以叙小節不

敢空謁伏念孔子乾

音坤

所挺西狩獲麟爲漢制作

故孝經援神契曰玄丘制命帝卯行又尚書考靈曜曰丘生倉際觸期稽度爲赤制故作春秋以明文命綴記撰書脩定禮義臣以爲素王稽古德亞皇代雖有褒成世享之封四時來祭畢卽歸國臣伏見臨辟雍曰祠孔子以太牢長史備爵所以尊先師重教化也夫封土爲社立稷而祀皆爲百姓興利除害以祈豐穰月令祀百辟卿士有益於民矧乃孔子玄德煥炳光于上下而本國舊居復禮之日闕而不祀誠朝廷聖恩所宜特加臣寢息耿耿情所思惟臣輒依社稷出王家穀春秋行禮以共禋祀餘胙賜先生執事

史君念孔瀆顏母井去市道遠酤買不能得香酒羹肉於昌平亭下立會市因彼左右咸所願樂又勅瀆井復民飭治桐車馬於瀆上東行道表南北各種一行梓擬夫子冢顏母井會及魯公冢守吏凡四人月與佐除銘曰昔在仲尼斗光之精大帝所挺顏母毓靈承敝遭衰黑不代蒼轍環應聘嘆鳳不臻自衛反魯養徒三千獲麟輒作端門見徵血書著紀黃玉齋

應主爲漢制道審可行乃作春秋復演孝經刪定六藝象與天談鈞河擿雒却揆未然巍巍蕩蕩與乾比

崇

熹平四年春三月詔諸儒正五經文字刻石立于太學門外

五年十二月試太學生年六十以上百餘人除郎中太子舍人至王家郎郡國文學吏

六年冬十月帝臨辟雍

光和元年二月己未始置鴻都門學畫先聖及七十二弟子像

五年冬十月校獵上林苑歷函谷關遂巡狩于廣成苑十二月還幸太學

六年刻石鏤碑載五經立于太學講堂前東側蔡邕自書丹于碑高一丈許廣四尺

漢獻帝初平四年九月甲午試儒生四十餘人上第賜位郎中次太子舍人下第者罷之詔曰孔子歎學之不講不講則所識日忘今耆儒年踰六十去離本土營求糧資不得專業結童入學白首空歸長委農

野永絕榮望朕甚愍焉其依科罷者聽爲太子舍人
冬十月太學行禮車駕幸永福城門臨觀其儀賜博
士以下各有差

魏文帝黃初二年春正月詔曰昔仲尼負大聖之才
懷帝王之器當衰周之末無受命之運在魯衛之朝
教化乎洙泗之上栖栖焉皇皇焉欲屈已以存道貶
身以救世於是王公終莫能用之乃退考五代之禮
脩素王之事因魯史而制春秋就太師而正雅頌俾
千載之後莫不宗其文以述作仰其聖以成謀茲可
謂命世大聖億載之師表者也遭天下大亂百祀墮
壞舊居之廟毀而不脩褒成之後絕而莫繼闕里不
聞講頌之聲四時不睹蒸嘗之位斯豈所謂崇化報
功盛德百世必祀者哉嗟乎朕甚憫焉其以二十一
世孫議郎孔羨爲宗聖侯邑百戶奉孔子祀令魯郡
脩舊廟置百戶卒史以守衛之又於其外廣爲屋宇
以居學者陳思王曹植記碑梁鵠書宋永嘉七年張
稚圭按圖記之植之碑頌曰煌煌大魏受命溥將繼
體黃虞含夏包商降登下土廓清三光郡祀咸秩靡

事不綱。嘉彼玄聖，有邈其靈。遭世霧亂，莫顯其榮。褒成既絕，寢廟斯傾。闕里蕭條，靡歆靡馨。我皇悼之，尋其世武。乃建宗聖，以紹厥後。脩復舊堂，豐其薨宇。莘莘學徒，爰居爰處。王教既新，群小逆沮。魯道以興，永作憲矩。洪聲豈假，神祇來和。休徵雜遝，瑞我邦家。內光區域，外被荒遐。殊方慕義，搏拊揚歌。於赫四聖，運世應期。仲尼既沒，文亦在茲。彬彬我后，越而五之。垂于億載，如山之基。

五年立太學于洛陽

魏明帝太和二年六月，詔曰：尊儒貴學，王教之本也。自頃儒官或泝其人，將何以宣明聖道？其高選博士，才任侍中、常侍者，申飭郡國貢士，以經學爲先。

四年春二月壬午，詔曰：世之質文隨教而變，兵亂以來，經學廢絕，後生進趣不由典謨，豈訓導未洽？將進用者，不以德顯乎？其郎吏學通一經，才任牧民，博士課試，擢其高第者，亟用；其浮華不務道本者，皆罷退之。戊子，詔太傅三公以文帝典論刻石立于廟門之外。

齊王芳正始二年春二月帝初通論語使太常以太
牢祭孔子於辟雍以顏淵配

五年五月癸巳講尚書經通使太常以太牢祠孔子
於辟雍以顏淵配賜太傅太將軍及侍講者各有差
七年冬十二月講禮記通使太常以太牢祀孔子於
辟雍以顏淵配

職方氏曰按晉書曰禮始立學必先釋奠於先聖
先師及行事必用幣漢世雖立學斯禮無聞然則
帝王釋奠而以孔子爲聖顏回爲師自魏齊王始

正始中劉馥疏曰黃初以來崇立太學二十餘年而
成者蓋寡由博士選輕諸生避役高門子弟耻非其
倫宜高選博士取行爲人表經任人師者掌教國子
依遵古法使二千石以上子孫年從十五皆入太學
明制黜陟陳榮辱之路不從

高貴鄉公髦甘露元年夏四月丙辰帝幸太學問諸
儒曰聖人幽贊神明仰觀俯察始作八卦後聖重之
爲六十四爻以極數凡斯大義罔有不備而夏有
連山殷有歸藏周曰周易易之書其故何也易博士

淳于俊對曰包羲因燧皇之圖而制八卦神農演之
爲六十四黃帝堯舜通其變三代隨時質文各繇其
事故易者變易也名曰連山似山出內氣連天地也
歸藏者萬事莫不歸藏於其中也帝又曰若使包羲
因燧皇而作易孔子何以不云燧人氏沒包羲氏作
乎俊不能荅帝又問曰孔子作彖象鄭玄作注雖聖
賢不同其所釋經義一也今彖象不與經文相連而
注連之何也俊對曰鄭玄合彖象於經者欲使學者
尋省易了也帝曰若鄭玄合之於學誠便則孔子曷

爲不合以了學者乎俊對曰孔子恐其與文王相亂
是以不合此聖人以不合爲謙帝曰若聖人以不合
爲謙則鄭玄何獨不謙邪俊對曰古義弘深聖問奧
遠非臣所能詳盡帝又問曰繫辭云黃帝堯舜垂衣
裳而天下治此包羲神農之世爲無衣裳但聖人化
天下何殊異爾邪俊對曰三皇之時人寡而禽獸衆
故取其羽皮而天下用足及至黃帝人衆而禽獸寡
是以作爲衣裳以濟時變也帝又問乾爲天而復爲
金爲玉爲老馬與細物竝邪俊對曰聖人取象或遠

或近近取諸物遠則天地講易畢復命講尚書帝問
曰鄭玄云稽古同天言堯同於天也王肅云堯順考
古道而行之二義不同何者爲是博士庾峻對曰先
儒所執各有乖異臣不足以定之然洪範稱三人占
從二人之言賈馬及肅皆以爲順考古道以洪範言
之肅義爲長帝曰仲尼言唯天爲大唯堯則之堯之
大美在乎則天順考古道非其至也今發篇開義以
明聖德而舍其大更稱其細豈作者之意邪峻對曰
臣奉遵師說未喻大義至於折中裁之聖思次及四
嶽舉鯀帝又問曰夫大人者與天地合其德與日月
合其明思無不周明無不照今王肅云堯意不能明
鯀是以試用如此聖人之明有所未盡耶峻對曰雖
聖人之弘猶有所未盡故禹曰知人則哲惟帝難之
然卒能改授聖賢緝熙庶績亦所以成聖也帝曰夫
有始有卒其唯聖人若不能始何以爲聖其言惟帝
難之然卒能改授蓋謂知人聖人所難非不盡之言
也經云知人則哲能官人若堯疑鯀試之九年官人
失敘何得謂之聖哲峻對曰臣竊觀經傳聖人行事

不能無失是以堯失之四凶周公失之二叔仲尼失之宰予帝曰堯之任鯀九載無成汨陳五行民用昏墊至於仲尼失之宰予言行之間輕重不同也至於周公管蔡之事亦尚書所載皆博士所當通也峻對曰此皆先賢所疑非臣寡見所能究論次及有鰥在下曰虞舜帝問曰當堯之時洪水爲害四害在朝宜速登賢聖濟斯民之時也舜年在旣立聖德光明而久不進用何也峻對曰堯咨嗟求賢欲遜已位嶽曰否德忝帝位堯復使嶽揚舉仄陋然後薦舜薦舜之本實由於堯此蓋聖人欲盡衆心也帝曰堯旣聞舜而不登用又時忠臣亦不進達乃使嶽揚仄陋而後薦舉非急於用聖恤民之謂也峻對曰非臣愚見所能逮及於是復命講禮記帝問曰太上立德其次務施報爲治何由而教化各異皆脩何政而能致於立德施而不報乎博士馬照對曰太上立德謂三皇五帝之世以德化民其次報施謂三王之世以禮爲治也帝曰二者致化薄厚不同將主有優劣那時使之然乎照對曰誠由時有樸文故化有薄厚也

二年五月辛未帝幸辟雍會命群臣賦詩侍中和道尚書陳騫等作詩稽留有司奏免官詔曰吾以暗昧愛好文雅廣延詩賦以知得失而乃爾紛紛良有反仄其原道等主者宜勅自今以後群臣皆當玩習古義脩明經典稱朕意焉

三年秋八月丙寅詔曰夫養老興教三代所以樹風化垂不朽也必有三老五更以崇至敬乞言納誨著在博史然後六合承流下觀而化宜妙簡德行以充其選關內侯王祥履仁秉義雅志淳固關內侯鄭小同溫恭孝友卽禮不忒其以祥爲三老小同爲五更車駕親率群司躬行古禮焉

晉武帝泰始三年詔太學及魯國四時以三牲祀孔子及七十二弟子

職方氏曰出王家錢備牛羊豕雞四時祠于魯則自漢桓帝時魯相乙瑛請始然不及七十二弟子天子通一經遣官以太牢祠孔顏于辟廱則自魏齊王始然亦不及四時與七十二弟子至于太學魯國皆以三牲祀四時而皆及七十二弟子則自

晉武帝始也後世春秋二丁之釋真實權輿于斯
矣

十二月徙二十三葉孫宗聖侯孔震爲奉聖亭侯拜
太常卿黃門侍郎

震字伯超莢子也

職方氏曰按縣之下爲亭漢和帝改褒成爲褒亭
從殺也至魏文帝而侯以宗聖隆之也晉武復侯
奉聖以亭則又殺矣而東晉宋因之

晉書曰武庫火屢代之寶皆焚孔子履漢祖斬蛇劍
並失焉

六年冬十一月幸辟雍行鄉飲酒之禮詔曰禮儀之
廢久矣乃今復講肄舊典賜太常絹百匹丞博士及
學生牛酒咸寧三年惠帝元康九年復行之

七年皇太子講孝經通咸寧三年講詩通太康三年
講禮記通惠帝元康三年皇太子講論語通東晉元
帝大興二年皇太子講論語通竝親釋奠以太牢祠
孔子以顏回配太子進爵于先師中庶子進爵于顏
回元帝詔曰吾識太子此事祠訖便請王公以下者
昔在洛時嘗豫清坐也

元帝太子卽明帝紹

武帝太康十年夏四月癸丑崇聖殿災

東晉元帝睿建武元年冬十一月丁卯置史官立太學

元帝太興二年六月景子罷御府及諸郡丞置博士員五人

四年春三月置周易儀禮公羊博士

明帝大寧三年詔給事二十三代奉聖亭侯孔嶷四時祠孔子祭宜如泰始故事食邑二千戶而嶷傳撫

豫章太守撫傳懿從事郎中懿傳鮮皆食邑一千戶鮮二十六

代當宋文帝王嘉十九年改封崇聖侯子乘

職方氏曰按孔嶷晉書宋書皆作孔亭而亭五代

孫繼之博塞無度常以祭直顧進替慢不祀宋文

帝王嘉八年有司奏奪爵

成帝咸康元年二月甲子帝講詩通親釋奠孔子於辟雍

穆帝永和十二年辛丑帝講孝經升平元年三月帝

講孝經通親釋奠于中堂如故事權以中堂爲太學

孝武帝寧康三年九月帝講孝經通十二月癸巳帝

釋奠於中堂祠孔子以顏子配享成穆孝武三帝皆親釋奠惟成帝在辟雍自是一時制也孝武時以學在水南懸遠有司議依升平元年於中堂權立行太學於時無復國子生有司奏應須復二學生百二十人太學生取見人六十國子生權銓大臣子孫六十八事訖罷奏可釋奠禮畢會百官六品以上

職方氏曰帝王講經通而使太常釋奠先聖師於辟雍則自魏齊王始然弗躬親自晉惠帝之爲太子講一經通則必親奠而後明帝暨東晉之成穆

孝武三帝皆踵而行之

孝武帝太元九年夏四月己卯增置太學生百人

十年春二月立國學

十一年秋八月庚午封孔靖之爲奉聖亭侯奉宣尼祀

自武帝太始八年有司奏太學七千餘人才任四品聽留詔已試經者留之其餘遣還郡國大臣子弟堪受教者令入學咸寧二年起國子學蓋周禮國之貴遊子弟所謂國子受教于師氏者也太康五年脩作

明堂辟雍靈臺孫休永安元年詔按舊置學官立五
經博士覈取應選加其寵祿科見史之中及將吏子
弟有志好者各令就業一歲課試差其第品加以位
賞以淳王化隆風俗于是立學元帝建武初驃騎將
軍王導疏曰頃皇綱失紀禮教陵替頌聲不興于今
二紀殿下以命世之資屬當傾危之運禮樂征伐翼
成中興將滌穢蕩瑕撥亂反正誠宜經綸稽古建明
學校闡揚六藝以訓後生使文武之道隳而復興苟
禮義膠固淳風載洽則化之所陶者廣而德之所被
者大義之所屬者深而威之所震者遠矣桓文之霸
皆先教而後戰今若聿遵前典興復教道使朝之子
弟並入於學立德出身者咸習之而後通德路開而
僞途塞則其化不肅而成不嚴而治矣選明博脩禮
之士以爲之師隆教貴道化成俗定莫尚於斯也散
騎常侍戴邈表曰昔仲尼列國之大夫興禮脩樂於
洙泗之間四方髦俊蜚然向風受業身通者七十餘
人自茲以來千載寂漠豈天下小于魯國賢哲乏于
曩時厲與不厲故也夫治世尚文遭亂尚武文武迭

用久長之道今以天下未一非興禮樂之時此言似是而非儒道深奧不可愴悴而成古之後又必三年而通一經比須寇賊清夷天下平泰然後脩之則功成事定誰與制禮作樂者哉又貴遊之子未必有斬將搴旗之才從軍征伐之役不及盛年講肄道義世喪道久民情玩習純風日去華莠日彰猶火之消膏而莫覺也謂宜以三時之隙漸就經始太興初議欲脩立學校唯周易王氏尚書鄭氏古文孔氏毛詩周官禮記論語孝經鄭氏春秋左傳杜氏服氏各置博士一人其儀禮公羊穀梁及鄭易皆省不置博士太常荀崧疏曰伏聞節省之制皆三分置二博士舊員十有九人今五經合九人準古計今猶未中半九人以外猶宜增四周易一經有鄭玄注其書根源誠可深惜宜爲鄭易博士一人儀禮一經所謂曲禮鄭玄于禮特明皆有證據宜置鄭儀禮博士一人春秋公羊其書精隱明于斷獄宜置博士一人穀梁簡約隱要宜存于世置博士一人今去聖久遠斯文將墜與其過廢寧過而立也臣以爲三傳雖同一春秋而發

端異趣案如三家異同之說義則戰爭之場詞亦劒
戟之鋒於理不可得共博士宜各置一人以傳其學
元帝詔曰崧表皆經國大務爲治所由息馬投戈就
可講藝今雖日不暇給豈忘本而道存耶可共博議
之有司奏宜如崧表詔曰穀梁膚淺不足立博士餘
如所奏會王敦難事不施行咸康三年國子祭酒袁
瓌太常馮懷又上疏帝有感焉由是議立國學徵集
生徒而世尚莊老莫肯用心儒術穆帝永和八年殷
浩西征以軍興罷遣由此遂廢征西將軍庾亮在武

昌開置學官下教建儒林祭酒使班同三署厚其供
給皆妙選邦彥以充此舉臨川臨賀三郡並聽脩復
學校若非束脩之流禮教所不及而欲階緣免役者
不得爲生明而條制令法清而人貴又繕禮器俎豆
將行大射禮亮尋薨又廢孝武太元元年尚書謝石
又陳之烈宗納其言選公卿二千石子弟爲生增造
廊屋一百五十五間而品課無章士君子耻與其列
國子祭酒殷茂言之臣聞舊制國子生皆冠族華胄
比列皇儲而中者混雜蕭艾遂令人耻若以當今急

病未遑斯典權宜停廢者別一理也若其不然宜依
舊準竊謂群臣內外清官子弟普應入學制以程課
今者見生或年在扞格方員殊趣宜聽其去就各從
所安烈宗下詔褒納又不施行朝廷及草萊有志于
學者莫不發憤歎息清河人李遼又表曰臣聞教者
治化之本人倫之始所以誘達群方進德興仁辟諸
土石陶冶成器雖復百玉殊禮質文參差至于斯道
其用不爽自中華湮沒闕里荒毀自此迄今將及百
年造化有靈否終以秦河濟夷陟海岱清通黎庶蒙

蘇鳧藻奮化而典訓弗敷雅頌寂蔑久凋之俗大敝
未改非演迤斯文緝熙宏猷將何以光贊時邕克隆
盛化哉事有如賒而實急此之謂也亡父先臣回綏
集邦邑歸誠本朝以太元十年遣臣奉表路經闕里
過觀孔廟庭宇傾頓執式頽弛萬世宗匠忽焉淪廢
仰瞻俯慨不覺涕流既達京輦表求興復聖祀脩建
講學至十四年十一月十七日奉被明詔采臣鄙議
勅下兗州魯郡準舊營飾故尚書令謝石令臣所須
列上又出家布薄助興立故鎮北將軍譙王恬版臣

行北魯縣令賜許供遣二臣薨徂成規不遂陛下體
唐堯文思之美訪宣尼善誘之勤矜荒餘之凋昧愍
聲教之未浹愚謂可重符兗州刺史遂成舊廟蠲復
數戶以供掃灑并賜給六經講立庠序延請宿學廣
集後進使油然入道發剖琢之功運仁義以征伐敷
道德以服遠何招而不懷何柔而不從所爲者微所
弘甚大臣自致身輦轂于今八稔違親轉積夙夜匪
寧振武將軍何澹之今震扞三齊臣當隨反裝回天
色感戀罔極乞臣表付外叅議又不見省故事祀臯

陶於廷尉寺新禮移祀於律署以同祭先聖於太學
也故事祀以社日新禮改以孟秋之日以應秋政摯
虞以爲按虞書臯陶作士師惟明克允國重其功人
思其當是以獄官禮其神繫者致其祭功在斷獄之
成不在律令之始也太學之設義重太常故祭于太
學是崇聖而從重也律署之置卑於廷尉移祀於署
是去重而就輕也律非正署廢興無常宜如舊祀於
廷尉又祭用仲春義取重生改用孟秋以應刑殺理
未足以相易宜定新禮皆如舊制可

晉安帝隆安三年北魏太祖天興二年三月令五經諸書各置

博士國子學生員三十人

職方氏曰凡南北朝而北有宜書者則分註其年

號于正統下書遼金元亦然

晉安帝隆安五年魏天興四年春二月丁亥命樂師入學

習舞釋菜于先聖先師

晉安帝義熙十四年北魏太宗泰常三年二月祀孔子於國學

以顏淵配

宋武帝永初三年正月乙丑詔曰古之建國教學為

先弘風訓世莫尚于此發蒙啓滯咸必由之爰自盛

王迄于近代莫不敦崇學藝脩建庠序自昔多故戎

馬在郊旂卷舒日不暇給遂令學校荒廢講誦蔑

聞軍旅日陳俎豆藏器訓誘之風將墜於地後生大

懼于面墻故老竊歎于子衿此國風所以永思小雅

所以懷古今王畧遠屆華域載清仰風之士日月以

冀便宜博延胄子陶獎童蒙選備儒官以振國學主

者考詳舊典以時施行

宋文帝元嘉三年北魏世祖太武皇帝始光三年二月起太學於城

東祀孔子以顏淵配。○宋詔十八代孫孔鮒爲百戶
主掌禮器

元嘉四年

魏始光四年

六月甘露降于太學王者德至天
和氣盛則降又王者敬老則相受甘露王者尊賢愛
老不失細微則竹簞受

元嘉十九年正月乙巳詔曰夫所因者本聖哲之遠
教本立化成敷學之爲貴故詔以三德崇以四術用
能納諸義方致之軌度盛王祖世咸必由之永初受
命憲章弘遠將陶鈞庶品混一殊風有詔典司大啓

庠序而頻遭屯夷未及脩建永瞻前猷思敷鴻烈今
方隅又寧戎夏慕嚮廣訓胄子實維時務便可式遵
成規闡揚景業○十二月丙申詔曰胄子始集學業
方興自微言泯絕逝將千祀感時思人意有慨然奉
聖之胤可速議繼襲於先廟地特爲營造依舊給祠
直令四時饗祀闕里往經寇亂黌校殘毀并下魯郡
脩復學校採召生徒昔之賢哲及一介之善猶或衛
其丘壘禁其芻牧况尼父德表生民功被百代而墳
塋荒蕪荆棘弗翦可蠲墓側數戶以掌灑掃魯郡上

民孔景等五戶居近孔子墓側蠲其課役供給灑掃
并種松柏六百株于是封孔隱之爲奉聖亭侯以續
繼之封後坐兄子熙先謀逆又失爵二十八年更以
二十六代孔惠雲爲奉聖亭侯後有重疾失爵

元嘉二十一年

北魏世祖太平真君五年

春正月庚戌魏詔曰自

頃以來軍國多事未宣文教非所以整齊風俗示軌
則於天下也今制自王公以下至於卿士其子息皆
詣太學其百工伎巧驪卒子息當習其父兄所業不
聽私立學校違者師身死主人門誅

宋文帝元嘉二十二年四月皇太子講孝經通釋奠
國子學採晉故事裴松之議應舞六佾設軒懸之樂
牲牢器用悉依上公祭畢上親臨學宴會太子以下
悉豫

元嘉二十三年九月己卯車駕幸國子學策試諸生
答問凡五十九人冬十月戊子詔曰庠序興立累載
胄子隸業有成近親策試觀濟濟之美緬想洙泗永
懷在昔諸生答問多可採覽教授之官並宜沾賚賜
帛各有差

元嘉二十七年魏太平真十一月辛卯魏車駕南伐

至鄒山使使者以太牢祀孔子

宋孝武帝孝建元年冬十月戊寅詔曰仲尼體天降

德繼周興漢經緯三極冠冕百王爰自前代咸加褒

述典司夫人用闕宗祀先朝遠存遺範有詔繕立世

故妨道事未克就國難頻深忠勇奮厲是憑聖義大

教所敦永惟兼懷無忘待旦可開建廟制同諸侯之

禮詳擇爽塏厚給祭秩

宋孝武帝大明二年封二十七代孔邁為奉聖亭侯

邁卒子莽嗣有辜失爵

宋明帝泰始四年北魏顯祖獻文魏以青徐既平遣

中書令兼太常高允以太牢祀孔子

泰始五年魏皇興魏詔孔氏四人為官

宋明帝泰豫元年北魏高祖孝文春二月乙巳詔曰

尼父稟達聖之資體生知之量窮理盡性道光四海

頃者徐淮未賓廟隔非所致令祀典寢頓禮章殄滅

遂使女巫妖覲淫進非禮殺生鼓舞倡優媒狎豈所

以尊明神敬聖道者也有今以後有祭孔子廟制用

周

酒脯而已不聽婦女合雜以祈非望之福犯者以違制論其公家有事自如常禮犧牲粢盛務盡豐潔臨事致敬令肅如也牧司之官明糾不法使禁令必行○六月丙申詔曰頃者州郡選貢多不以實碩人所

以窮處幽仄鄙夫所以超分妄進豈所謂旌賢樹德者也今年貢舉尤爲猥濫自今所遣皆門盡州郡之高才極鄉閭之選

宋後廢帝元徽元年魏延興三年夏四月壬子詔以孔子二十七世孫魯郡孔乘爲崇聖大夫食邑五百戶給

十戶以供灑掃

齊太祖高皇帝建元四年春正月壬戌詔曰夫膠庠之典彛倫攸先所以招振才端啓發性緒弘字黎氓納之軌義是故五禮之迹可傳六樂之容不泯朕自膺曆受圖志闡經訓且有司群僚奏議咸集蓋以戎車時警文教未宣思樂泮宮永言多慨今闕燧無虞時和歲稔遠邇同風華夷慕義便可式遵前准脩建敦學精選儒官廣延國胄有司奏置學生百五十人其有位樂入者五十人生年十五以上二十以還取

王公已下至三將著作郎廷尉正太子舍人領護諸
府司馬諮議經除勅者諸州別駕治中等見居官及
罷散者子孫悉取家去都二千里爲限○官置國子
祭酒一人准諸胄尚書博士二人准中書郎助教十
人淮南臺御史選經學爲先若其人難備給事中以
還明經者以本位領其下典學二人三品准太常主
簿戶曹儀曹各二人五品白簿治禮吏八人六品保
學醫二人威儀二人皆隸太常另有博士謂之太學
博士先是晉太始六年以國學廢初置總明觀玄儒
文史四科置學士各十人正令史一人書令史二人
幹一人門吏一人典觀吏二人以掌治五禮其夏國
諱廢學有司奏省助教以下

齊世祖武帝永明三年

魏孝文帝太和九年

春正月詔曰春秋

國語云生民之有學教猶樹木之有枝葉果行育德
咸必由茲在昔開運光宅華夏方弘典謨克隆教思
命彼有司崇建庠塾甫就經始仍離屯故仰瞻徽猷
歲月彌遠今遐邇一體車軌同文宜高選學官廣延
胄子創立堂宇以尚書令王儉領祭酒省總明觀祭

酒召公卿子弟下及員外郎之胤凡置生二百人其
年秋中悉集有司奏宋元嘉舊事學生到先釋奠先
聖先師禮又有釋菜未詳今當行何禮用何樂及禮
器尚書令王儵議周禮春入學舍菜合舞記云始教
皮弁祭菜示敬道也又云始入學必祭先聖先師中
朝以來釋菜禮廢今之所行釋奠而已金石俎豆皆
無明文方之七廟則輕比之五禮則重陸納車胤謂
宣尼廟宜依亭侯之爵范甯欲依周公之廟用王公
儀范宣謂當其爲師則不臣之釋奠日備帝王禮樂

此則車陸失於過輕二范傷於太重喻希云若至王
者自設禮樂則肆賞於至敬之所若欲加美先師則
所况非備尋其此說守附情理皇朝屈尊弘教待以
師資引同上公即事惟允元嘉立學裴松之議應舞
六佾以郊樂未具故權奏登歌今金石已備宜設軒
縣之樂六佾之舞牲牢器用悉依上公其冬皇太子
講孝經親臨釋奠車駕幸聽○戊寅魏詔曰圖讖之
興起于三季旣非經國之典徒爲妖邪所憑自今圖
讖秘緯及名爲孔子閉房記者一皆焚之留者以大

辟論

永明四年

魏太和十年

三月辛亥國子講孝經車駕幸學

賜國子祭酒博士助教絹各有差○九月辛卯詔起明堂辟雍

永明五年

魏太和十一年

冬十月甲戌詔曰鄉飲禮廢則長

幼之敎亂孟冬十月民閑歲隙宜於此時道以德義可下諸州黨里之內推賢而長者教其里人父慈子孝兄友弟順夫和妻柔不率長教者具以名聞

永明七年二月己丑詔曰宣尼誕敷文德峻極自天

發輝七代陶鈞萬品英風獨舉素王誰匹功隱於當年道深於日月感麟厭世緬邈千祀川竭谷虛丘夷淵塞非但洙泗湮淪至乃饗嘗之主前王敬仰崇脩寢廟歲月亟流鞠爲茂草今學敷興立實稟洪規撫事懷人彌增欽屬可改築宗祊務在爽塏量給祭秩禮同諸侯奉聖之爵以時紹繼

永明七年

魏太和十三年

秋七月丙寅立孔子廟於京師

永明八年國子博士何胤時爲祭酒擬所服陸澄等皆不能據遂以玄服臨試月餘日博議定乃服朱衣

永明九年魏太和十五年八月壬辰議養老已亥詔諸州舉

秀才先盡才學

永明十年魏太和十六年春正月戊辰帝臨思義殿策問秀

才○二月丁酉魏詔宣尼之廟祀於中書省丁未改

謚宣尼曰文聖尼父告謚孔廟別勅有司享薦之禮

癸丑帝臨宣文堂引儀曹尚書劉昶鴻臚卿游明根

行儀曹事李韶授策孔子崇文聖之謚於是昶等就

廟行事既而帝齋中書省親拜祭於廟○八月己酉

以尉元為三老游明根為五老又養國老庶老將行

大射之禮雨不克成

永明十一年魏大和十七年九月壬申魏主觀洛橋幸太學

觀石經

齊高宗明帝建武二年魏太和十九年夏四月庚申魏主幸

魯城親祠孔子廟辛酉詔拜孔氏四人顏氏二人為

官詔兖州刺史舉部內士人才堪軍國及守宰治行

具以名聞又詔賜兖州民爵及粟帛如徐州又詔選

諸孔宗子一人得二十八代孫珍譜作靈珍封崇聖侯邑

二百戶以奉孔子之祀又詔兖州為孔子起園栢脩

飾墳壠更建碑銘褒揚聖德

職方氏曰按孔子之謚得爲聖而崇聖大夫之升爲侯皆自北魏孝文始而珍傳二十九世文泰文泰傳三十世渠皆爲崇聖侯食邑一千戶子所稱夷狄之有君乎

建武三年

魏太和二十年

春三月丙寅魏主宴群臣及國老

庶老於華林園詔國老黃耆以上假中散大夫郡守耆年以上假給事中縣令庶老直假郡縣各賜鳩杖衣裳丁丑詔諸州中正各舉其鄉之民望年五十以

上守素衡門者授以令長

建武四年春正月庚午立學詔曰嘉穀停俎定方旨於必甘良玉在攻表珪璋於旣就是以陶鈞萬品務本爲先經緯九區學敷爲大往因時康崇建庠序屯虞薦有權從省廢謳誦寂寥倏移年稔永言古昔無忘旰昃今華夷乂安要荒慕嚮締脩東序寔允適時便可式依舊章廣延國胄弘敷景業光被後昆

齊明帝永泰元年三月詔曰仲尼明聖在躬允光上哲弘厥雅道大訓生民師範百王軌儀千載立人斯

仰忠孝攸出玄功潛被至德彌闡雖反袂遐曠而祧
薦靡缺時祭舊品秩比諸侯頃歲以來祀典陵替俎
豆寂寥牲奠莫舉豈所以克昭盛烈永隆風教者哉
可式循舊典詳復祭秩使牢餼備禮欽饗兼申是年
七年東昏侯即位尚書符依永明舊事廢學領國子
助教曹思文上表曰古之建國君民者必教學爲先
將以節其邪情而禁其流欲故能化民裁俗習與性
成也是以忠孝薦焉信義成焉禮讓行焉尊教宗學
其致一也是以成均煥於古典虎門炳於前經陛下
體睿淳神纘承鴻業今制書既下而廢學先聞將恐
觀國之光者有以擬議也若以國諱故宜廢昔漢成
之學爰洎元始百餘年中未嘗暫廢其間有國諱也
且晉武之崩又其學猶存斯皆先代不以國諱而廢
學之明文也永明以無子故廢斯非古典也尋國之
有學本以興化致治也天子於以諮謀焉於以行禮
焉記云天子出征受命於祖受成於學執有罪反釋
奠於學又云食三老五更於太學天子袒而割牲執
爵而醕以教諸侯悌也於斯學是天子有國之基教

也或以之所言皆太學事也今引太學不非證也據
臣所見今之國學卽古之太學晉初太學生三千人
旣多猥雜惠帝時欲辨其涇渭故元康三年始立國
子學官品第五以上得入國學天子去太學入國學
以行禮也太子去太學入國學以齒讓也太學之與
國學斯是晉世殊其士庶異其貴賤耳然貴賤士庶
皆須教成故國學太學兩存之也非有太子故立也
然繫廢興於太子者此永明之鉅失也漢崇儒雅幾
致刑厝而猶道謝三五者以其致教之術未篤也古
之教者家有塾黨有庠術有序國有學以諷誦相摩
今學非唯不宜廢而已乃宜更崇尚其道望古作規
使郡縣有學鄉閭立教請付尚書及二學詳議有司
奏從之學竟不立

北魏高祐出爲兗州刺史鎮滑臺以郡國雖有學鄉
黨亦宜有之乃命縣立講學黨立小學

梁武帝天監元年

魏世宗宣武皇帝景明三年

八月乙卯魏以前

太傅平陽公丕爲三老

天監四年春正月癸卯詔曰二漢登賢莫非經術服

膺雅道名立行成魏晉浮蕩儒教淪歇風節罔樹抑
此之由今九流常選年未三十不通一經不得解謁
若有才同其類勿限年次可置五經博士各一人廣
開館宇招納後進賀瑒明山賓沈峻嚴植之補博士
各主一館射策通明者卽除吏暮年懷經負笈者雲
集○六月庚戌初立孔子廟

天監五年春正月丁卯朔詔曰在昔周漢取士方國
項代凋訛幽仄罕被人孤地絕用隔聽覽士操淪胥
因茲靡勸豈其岳瀆縱靈偏有厚薄寔由知與不知

用與不用耳朕以菲德君此兆民而兼明廣照屈於
堂戶飛耳長目不及四方永言愧懷無忘旦夕凡諸
郡國舊族邦內無在朝位者選官搜括使郡有一人

天監六年

魏宣武正始四年

夏六月己丑朔魏詔曰高祖德

格兩儀明並日月播文教以懷遠人調禮樂以旌雋
造徙縣中區光宅天邑總霜露之所均一姬卜於洛
浹戎繕兼興未遑儒教朕慕承鴻緒君臨寶曆思模
聖規述遵先志今天平地寧方隅無事可勅有司準
訪前式置國子立太學樹小學於四門

天監七年

魏宣武永平元年

春正月乙酉朔魏詔曰建國君

民立教爲首不學將落嘉植靡由朕肇基明命光宅
區宇雖耕耘雅業傍闡藝文而成器未廣志本猶闕
非所以鎔範貴遊納諸軌度思欲式敦讓齒自家刑
國今聲訓所漸戎夏同風宜微言載表○二月庚午
詔於州郡縣置州望郡宗鄉豪各一人專掌搜薦○
十二月魏尚書令高肇尚書僕射清河王懌等奏置
小學博士員三千人

天監八年五月壬午詔曰學以從政殷勤往哲祿在

其中抑亦前事朕思闡治綱每敦儒術軾問闕館造

次以之故負表成風甲科間出方當置諸周行飾以

青紫其有能通一經始末無倦者策實之後選可量

加敘錄雖復牛監羊肆寒品後門並隨才試吏勿有

遺漏○皇太子釋奠周捨議旣惟大禮請依東宮元

會太子著絳紗襪樂用軒懸合升殿坐者皆服朱衣

帝從之又有司以爲禮云凡爲人子者升降必由阼

階吏部郎徐勉議鄭玄云由命士以上父子異宮宮

室旣異無不由阼階之禮請釋奠及宴會太子升堂

並宜由東階若車駕幸學自然中階其會賓客依舊
西階太同七年皇太子表其子寧國臨城公入學時
議者以與太子有齒胄之議疑之議中臣續等以為
參點回路並事宣父鄒魯稱盛 文無譏師道既光
得一資敬無虧亞二制可

天監九年三月己丑車駕幸國子學親臨講肄賜國
子祭酒以下帛各有差乙未詔曰玉子從學著自禮
經貴遊咸在實惟前誥所以式廣義方克隆教道今
成均大啓元良齒讓自斯以降並宜隸業皇太子及

王侯之子年在從師者可令入學

天監十一年

魏宣武延昌元年

夏四月丁卯詔曰

魏詔遷京嵩縣

年將二紀虎闌闕唱演之音四門絕講誦之業博士
端然虛祿歲祀貴遊之胄歎同子衿靖言念之有兼
愧慨可嚴勅有司國子學孟冬使成太學四門明年
暮春令就

梁武帝普通元年

魏肅宗孝明皇帝正光元年

春正月乙酉詔曰

建國緯民立教為本尊師崇道茲典自昔來歲仲陽
節和氣潤釋奠孔顏乃其時也有司可豫繕國學圖

飾聖賢置官簡牲擇吉備禮

晉通二年

魏正光二年

二月癸亥車駕幸國子學講孝經

三月庚午帝幸國子學祠孔子以顏淵配

梁武帝大通四年三月庚午侍中領國子博士蕭子

顯上表置制旨孝經助教一人生十人專通高祖所

釋孝經義

武帝大同五年

北魏靜帝興和元年

都督兖州諸軍事兖州刺

史李仲璇脩建孔子容像雕素十哲顏氏等於其側

樹碑廟庭頌曰二儀肇泮人倫攸舉邈邈玄王誕茲

聖緒祖習堯舜憲章文武聲溢九天化覃八宇化覃

伊何窮神盡妙光同麗景溥天孤照無異岱宗巖巖

時峭重山隱寶深霞秘暉在哀之葉自衛言歸德生

於予文實在茲彛倫禮樂尅敘書詩

驚 仄管

流氣良木其樞緬踰千祀以存恕亡允諸靈意不有

伊人孰云脩置惟君體道布政優優白鳩巢室赤雀

栖樓禮罔不備智無不周器冠後哲風邁前脩既繕

孔像復立十賢誠蕪岱宇懃盡重玄仰聖儀之煥爛

嘉鴻業之嬋聯長無絕兮終古永萬億兮斯年

大同七年皇太子釋奠於國學時樂府無孔子顏子
登歌詞令杜之偉製文伶人傳習以爲故事

北齊文宣帝改封二十八代孔長公爲恭聖侯

職方氏曰是時南北分朝而皆知宗聖以爲重故
北朝若元魏周齊既不輟宗子之傳而南朝若東
晉南宋齊梁復有靖之隱之惠靈與邁之封如梁
敬帝詔云搜舉魯國之族以爲奉聖之後者則其
爲旁支而非本嫡可知矣讀者當于此有辨而孔
氏子姓自曲阜而遷徙于外者則二十二代衍避

地江東晉元帝引爲安東參軍中庶子王敦惡而
出爲廣陵郡石勒以公儒雅之士勅其黨不得妄
入郡境潛爲弑十四世孫先居梁國潛爲後漢太
子少傅避地會稽遂爲山陰人二十六代淳之少
有志通典墳居會稽剡縣居喪至孝廬墓側元嘉
中徵爲散騎侍郎逝于上虞界中二十八代祐有
至行通神隱于四明山太守王僧虔引爲主簿不
就二十九代道徽少勵高行隱居南山終身不窺
都邑豫章君辟不就三十八代克符與兄克讓俱

隱嵩山四十代績唐文德元年調吉州推官遂家
新淦文仲武仲平仲其後也四十一代仲良唐蒲
田令卒于官因家焉朱文公嘗訂其譜四十六代
收宋仁宗慶曆七年賜汝州龍興縣處士粟帛公
隱居縣之龍山強陽城廬墓壁間生紫草數十本
州以行義聞故有是賜及宋南渡四十七代傳與
衍聖公端友寓居衢州後有因仕而家于徽湖撫
鄂四州者皆自衢而分蓋廟宅譜牒特繼以嫡相
承者支子旁孫皆不復錄故散而之四方者莫可
攷證皆聖人之後也今在南者新淦尋陽爲右云
四十八代端植宰鄂之通城因家于鄂

梁簡文帝太寶元年

北齊文宣帝
天保元年

六月己卯詔封三

十一葉孫孔渠爲崇聖侯邑一百戶以奉孔子祀并
下魯郡以時脩治廟宇務盡褒崇之至又詔堯祠舜
廟孔父老君等載在祀典者咸秩罔遺

北齊祈禱有九曰雩曰南郊曰堯廟曰孔顏廟曰社
稷曰五岳曰四瀆曰滄口曰豹祠水旱癘疫皆有事
焉無牲以酒脯棗栗若建午未申月不雨則使三公

祈五帝於雩壇祈五天帝於郊壇五人帝各在天帝
之左堯廟則遣使祈於平陽孔顏廟則遣使祈於國
學將講於天子先定經於孔父廟置執經一人侍講
二人執讀一人擣句二人錄義六人奉經二人講之
且皇帝服通天冠玄紗袍乘象輅至學坐廟堂上講
畢以一太牢釋奠孔子配以顏回列軒懸樂六佾舞
行三獻禮畢皇帝服通天冠絳紗袍升阼即坐宴畢
還宮皇太子每通一經及新立學亦釋奠乘石山安
車三師乘車在前三少從後而至學焉每歲春秋二
仲常行其禮每月朔置制祭酒領博士以下及國子
諸學生以上太學四門博士升堂助教以下太學諸
生階下拜孔揖顏日出行事而不至者謂之一負郡
學則于坊內立孔廟博士以下亦每月朝張憑議曰
不拜顏子者按學堂舊有聖賢之象旣備禮盡敬奉
尼父以爲師而未詳顏子拜揖之儀臣以聖者君道
也師者賢臣道也若乃堯舜禹君位則稷契與我並
爲臣矣師玄風于洙泗則顏子吾同門也夫大賢恭
已旣揖讓于君德回也如愚豈越分于人師哉是以

王聖佐賢而君臣之義著拜孔揖顏而師貴之分同
矣○八月詔郡國脩立學序廣延髦儁敦述儒風其
國子學生亦仰依舊詮補服膺師說研習禮經往者
文襄皇帝所建蔡邕石經五十枚卽宜移置學館依
次脩立

梁元帝爲荊州刺史起州學宣尼廟置儒林參軍一
人勸學從事二人生三十人加廩餼自圖宣尼像而
書之時人謂之三絕

梁敬帝太平二年春正月壬寅詔曰夫子降靈體詰
經仁緯義克素王載闡玄功仰之者彌高誨之者
不倦立忠立孝德被蒸民制禮作樂道冠群后雖泰
山極峻一簣不遺而泗水餘瀾千載猶在自國圖屯
阻祧薦不脩奉聖之門胤嗣殲滅敬神之寢篋篋寂
寥永言聲烈寔兼欽愴可搜魯國之族以爲奉聖後
并繕廟堂祇備祀典四時薦秩一皆遵舊是日又詔
諸州各置中正依舊訪舉不得輒承單狀序官皆令
中正押上然後量授詳依品制務使精實其荆雍青
兗雖暫爲隔闕衣冠多寓淮海猶宜不廢司存會計

罷州尚為大郡人士殷曠可別置邑居至如分割郡縣新號州牧並係本邑不勞兼置其選中正每求耆德該悉以他官領之

陳文帝天嘉元年

北齊孝昭皇帝建元年

八月甲午北齊詔國子寺

可備立官屬依舊置生講習經典歲時考試其文襄

帝所運石經宜即施列于學館外州大學亦仰典司

勤加督課

天嘉四年

後周高祖武皇帝保定三年

夏四月戊午周主幸太學

以太傅燕國公于謹為三老而問道焉

陳文帝天康元年

後周高祖天和元年

秋七月壬午詔諸胄子

入學但束脩於師不勞釋奠釋奠者學成之祭自今

即為恒式

陳廢帝光大元年

後周天和二年

秋七月甲辰立露門學置

生七十二人○十二月庚寅以儀同三司兼從事中

郎孔英哲為奉聖亭侯奉孔子祀

光大二年

後周天和三年

八月癸酉帝御大德殿集百僚及

沙門道士等親講禮記

陳宣帝大建三年皇太子親釋奠於太學二傅祭酒

以下賚帛有差

陳宣帝大建五年

後周高祖建德二年

十二月

後周癸巳集群臣及

沙門道士等帝陞高座辨釋三教先後以儒教為先道教為次佛教為後

大建六年

後周建德三年

夏

後周

四月丙子初斷佛道二經像悉

毀罷沙門道士并令還民并禁諸淫祠禮典所不載者盡除之○六月戊午詔曰至道弘深混成無際體

包空有理極幽玄但岐路既分派源逾遠淳離朴散形氣斯乖遂使三墨八儒朱紫交競九流七畧異說

相騰道隱小成其來舊矣夫不有會歸爭驅靡息今可立通道觀聖哲微言先賢典訓金科玉篆秘蹟玄文所以濟養黎元扶成教義者並宜弘闡一以貫之俾夫翫培塿者識嵩岳之崇嶺守磧礫者悟勅解之泓澄不亦可乎

大建九年

後周建德六年

三月壬午詔

後周

山東諸州各舉明經

幹治者二人若竒才異術卓爾不群者弗拘多○九月壬辰詔東土諸州儒生明一經已上並舉送州郡以禮發遣

大建十年

後周宣帝宣政元年

八月壬申

詔制九條宣下州郡

八曰州舉高才博學者為秀才郡舉經明行脩者為

孝廉上州上郡歲一人下州下郡三歲一人

大建十一年

後周靜帝大象元年

春正月辛卯詔徙鄴城石經

於洛陽

大建十二年

後周大象二年

二月丁巳帝幸靈門學行釋奠

之禮○五月乙未宣帝寢疾詔帝入宿於露門學

大建十三年

後周大象三年

二月丁亥詔曰大德之後是稱

不絕功施於民義昭祀典孔子德惟藏往道實生知

以大聖之才屬千古之運載弘儒業式次彝倫至如

叅贊天人之理裁成禮樂之務作範百王垂風萬葉

朕欽承寶曆服膺教義春言洙泗懷道滋深而褒成

啓號雖彰故實旌崇聖績猶有闕如可追封為鄒國

公邑數准舊并立後承襲別於京師置廟以時祭享

因改封渠為鄒國公渠傳三十一代長孫三十二代

英哲皆為鄒國公

陳後主至德三年十一月己未脩復仲尼廟詔曰宣

尼誕膺上哲體資至聖祖述憲章之典並天地而合

德樂正雅頌之奧與日月而偕明垂後昆之訓範開
生民之耳目梁季湮微靈寢忘處鞠爲茂草三十餘
年敬仰如在永惟愾息今雅道棄熙由虞得所斷琴
故履零落不追閔笥開書無因循復外可詳之禮典
改築舊廟蕙房桂棟咸使維新芳馨潔漆以時饗奠
十二月辛卯皇太子出太學講孝經戊戌講畢辛丑
釋奠於先師禮畢設金石之樂會宴王公卿士

隋文帝仁壽元年六月乙丑詔曰儒學之道訓教生
人識父子君臣之義知尊卑長幼之序升之于朝任
之以職故能贊理時務弘益風範朕撫臨天下思弘
德教延集學徒崇建庠序開仕進之路佇賢俊之人
而國學胄子垂將千數州縣諸生咸亦不少徒有名
錄空度歲時未有德爲代範才任國用良由設學之
理多而未精今宜簡省明加獎勵于是國學惟留學
生七十人太學四門及州縣學並廢前殿內將軍河
間劉炫切諫不聽○秋七月戊戌改國子學爲太學
贈孔子爲先師尼父時英哲無子弟嗣愆應制登科
授涇州司兵參軍遷太子通事舍人襲封鄒國公

隋制國子寺每歲四仲月上丁釋奠於先聖先師年
別一行鄉飲酒禮州縣學則以春秋仲月釋奠每年
于學一行鄉飲酒禮釋奠登歌以誠夏詞曰經國立
訓學重教先三墳肇開五典留篇開鑿理著陶鑄功
宣東膠西序春誦夏弦芳塵載仰祀典無騫

職方氏曰漢明帝脩養老禮而推之郡國縣道行
鄉飲酒于學校卽虞夏殷周養國老庶老義也曰
孟冬亦如之蓋天子以冬十月壬子行禮而郡國
縣道亦如其孟冬則歲一舉耳隋世國子寺州縣

學亦年一行鄉飲酒禮而我

朝自孟冬朔十月昭外特于歲首上元先一舉行則
視漢隋爲加隆矣漢明帝令郡國縣道皆祀先聖
先師周公孔子于學校牲以犬多在孟冬不著時
日晉于太學魯國四時皆以三牲祀孔子及七十
二弟子亦不言用上丁至隋文帝國子寺以歲四
仲月上丁釋奠州縣學以春秋仲則用丁之始而
亦二祭通于天下之始也我

朝則國學亦以二仲上丁無四仲釋奠然每月朔皆

釋菜則又視漢隋爲加隆矣日何以用丁文明象也何不用丙丙陽火也仰以觀于天文避之也丁陰火也觀人文以化成天下象之也周禮外祀用剛日內祀用柔日家廟爲內祀故用柔先師外祀也何不用剛而用柔則郊天用上辛之義也外祀上莫尊于天不用庚而用辛下莫尊於聖不用丙而用丁是以天事聖也夫干首甲七日來庚先甲三日爲辛後甲三日爲丁而先庚三日亦復爲丁此聖人之先天而天弗違後天而奉天時也若社稷用上戊則剛日矣詩祭馬祖曰吉日惟戊曰吉日庚午皆用剛也嗚呼古人制禮厥義精矣

隋煬帝大業元年閏七月景子詔曰君民建國教學爲先移風易俗必自茲始而言絕義乖多歷年代進德脩業其道寢微漢採坑焚之餘不絕如線晉承板蕩之運掃地將盡自是厥後軍國多虞雖復黷字時建示同愛禮函丈或陳殆爲虛器遂使紆青拖紫非以學優製錦操刀類多墻面上陵下替綱維靡立雅缺道消實由於此朕慕承洪緒思弘大訓將欲尊師

重道用闡厥繇講信修睦敦獎名教方今宇宙平一文軌攸同十步之內必有芳草四海之中豈無奇秀諸在家及見入學者若有篤志好古耽悅典墳學行優敏堪膺時務所在採訪具以名聞即當隨其器能擢以不次若研精經術未願進仕者可依其藝業深淺門廡高卑雖未升堂並量準給祿庶夫恂恂善誘不日成器濟濟盈朝何遠之有其國子等學亦宜申明舊制教習生徒具爲課試之法以盡砥礪之道

四年十月丙午詔曰先師尼父聖德在躬誕發天縱之資憲章文武之道命世膺期蘊茲素王而頽天之歎忽踰于千祀盛德之美不存于百代永惟懿範宜有優崇可立孔子後爲紹聖侯有司求其苗裔錄以申上于是改封嗣哲爲紹聖侯食邑一千戶

升定世家子

中上平

蘇對

燦

之

